

四庫全書

集部

欽定四庫全書

施註蘓詩卷十四

宋 蘇軾 撰

施元之原註

武進邵長衡刪補

詩三十五首

時守彭城洎戊
午元豐改元作

續麗人行 并引

李仲謀家有周昉畫背面欠伸內人極精戲作

此詩

張彥遠名畫記周昉字景玄官至宣州長史多在渾郭功臣家圖畫又云周昉善畫

女子

深宮無人春日長沈香亭北百花香美人睡起薄梳洗
燕舞鶯啼空斷腸畫工欲畫無窮意背立東風初破睡
若教回首卻嫣然陽城下蔡俱風靡杜陵饑客眼長寒
蹇驢破帽隨金鞍隔花臨水時一見只許腰肢背後看
心醉歸來茅屋底方信人間有西子君不見孟光舉案

與眉齊何曾背面傷春啼

楊妃外傳開元禁中重木芍藥移植於沉香亭前會花
方繁開上與妃子賞花命李白進清平調三章末云解
釋春風無限恨沉香亭北倚欄干宋玉登徒子好色賦
嫣然一笑惑陽城迷下蔡漢韓信傳用廣武君策發使
燕燕從風而靡杜子美麗人行背後何所見珠壓腰祔
穩稱身列子黃帝篇有神巫曰季咸列子見之而心醉

聞李公擇飲傅國博家大醉二首

兒童拍手鬧黃昏應笑山公醉習園縱使先生能一石
主人未肯獨留髡

晉山簡注屢見李白襄陽歌落日欲沒峴山西倒著接
離花下迷襄陽小兒齊拍手攔街爭唱白銅鞮傍人借

問笑何事笑殺山翁醉似泥史記滑稽傳淳于髡曰臣
飲一斗亦醉一石亦醉云云日暮酒闌合尊促坐男女
同席履舄交錯杯盤狼藉堂上燭滅主人留髡而送客
羅襦襟解微聞薜澤當此之時髡心最歡能飲一石
不肯惺惺騎馬迴玉山知為玉人顏紫雲有語君知否

莫喚分司御史來

劉禹錫揚州春夜詩寂寂獨看金燼落紛紛只見玉山
顏自羞不是高陽侶一夜惺惺騎馬迴世說山公稱嵇
叔夜之為人也巖巖若孤松之獨秀其醉也忽若玉山
之將頹唐闕記杜牧為御史久之分務洛陽時李聰罷
鎮開居聲妓豪華為當時第一嘗宴客女妓百餘皆殊
色牧注視良久問曰聞有紫雲者孰是宜以見惠李俯
而笑諸妓皆回首破顏牧自飲三爵朗吟而起曰華堂
今日綺筵開誰喚分司御史來忽發狂言驚滿座兩行

紅粉一時迴意氣
閒逸傍若無人

起伏龍行 并引

徐州城東二十里有石潭父老云與泗水通增損
清濁相應不差時有河魚出焉元豐元年春旱或
云置虎頭潭中可以致雷雨用其說作起伏龍行
何年白竹千鈞弩射殺南山雪毛虎至今顱骨帶霜牙
尚作四海毛蟲祖東方久旱千里赤三月行人口生土
碧潭近在古城東神物所蟠誰敢侮上歌蒼苔擁巖竇

下應清河通水府眼光作電走金蛇鼻息為雲擢煙縷
當年負圖傳帝命左右義軒詔神禹爾來懷寶但貪眠
滿腹雷霆瘖不吐亦龍白虎戰明日公自注是月丙辰明日庚寅倒
卷黃河作飛雨嗟我豈樂鬪兩雄有事徑須煩一怒

後漢南蠻傳板楯者秦昭襄王時有一白虎常從羣虎
數遊秦蜀巴漢之境昭王重募國中能殺虎者時有巴
郡閬中人能作白竹之弩登樓射殺白虎昭王嘉之
乃刻石盟要人安之三國志魏杜襲傳千鈞之弩不
為鼪鼠發機尚書故實南中久旱以繩繫虎頭骨投有
龍處入水即數人牽制不定俄頃雲起潭雨亦隨下龍
畏虎雖枯骨能動之如此劉禹錫嘉話亦云毛蟲字出
漢書五行志帝王世紀龍馬出圖於河伏羲觀之以畫

八卦黃帝言余夢兩龍挺白圖以授余於河之都又洛
出龜書以賜神禹洪範是也張華博物志龍抱寶而眠
謂之癡龍史記孟嘗君傳秦齊世不兩雄洞
庭靈姻傳堯遭洪水九年乃此子一怒耳

聞公擇過雲龍張山人輒往從之公擇有詩戲

用其韻

我生固多憂肉食常苦墨軒然就一笑猶得好飲力聞
君過雲龍對酒兩靜默急攜清歌女出郭及未晡一歡
難力致邂逅有勝特喧蜂集晚花亂雀啁叢棘山人樂
此耳寂寞誰侍側何當求好人聊使治要褼使君自孤

債此理誰相值不如學養生一氣服千息

左傳哀十三年晉定公吳夫差會于黃池吳晉爭先司馬寅曰請姑視之反曰肉食者無墨今吳王有墨國勝乎太子死乎杜預注墨氣色下也後漢薊子訓傳軒渠笑悅欲往就之詩國風摻摻女手可以縫裳要之禱之好人服之漢匈奴傳冒頓為書遺高后曰陛下獨立孤債獨居兩主不樂無以自虞注債仆也猶言不能自立也虞與娛同晉許邁傳常服氣一氣千餘息

送李公擇

嗟余寡兄弟四海一子由故人雖云多出處不我謀弓車無停招逝去勢莫留僅存今幾人各在天一隅有如此

長庚月到曉爛不收宜我與夫子相好手足侔比年兩
見之賓主更獻酬樂哉十日飲衍衍和不流論事到深
夜僵仆鈴與騶頗嘗見使君有客如此不欲別不忍言
慘慘集百憂念我野夫兄知名三十秋已得其為人不
待風馬牛他年林下見傾蓋如白頭

詩國風終鮮兄弟惟予二人左傳逸詩翹翹車乘招我
以弓史記范雎傳秦昭王遺平原君書曰君幸過寡人
願與君為十日飲王注鈴守鈴閣者漢東方朔傳給騶
侏儒師古曰騶奉廐之御也晉謝安傳桓溫請安為司
馬既到溫喜問左右曰頗嘗見我有如此客不野夫公擇之兄名萃

送荀芍藥與公擇二首

久客厭鹵饌

公自注蜀人謂東北人鹵子

枵然思南京故人知我意

千里寄竹萌駢頭玉嬰兒一一脫錦棚庖人應未識旅

人眼先明我家拙厨饌彘肉茱萸菁送與江南客燒煮

配香粳

韓退之初南食詩自宜味南烹爾雅荀竹萌也吳筠竹賦一筍明其膚嗣三節獲乎嬰兒儲先義荀詩稚子脫錦棚駢頭玉香滑張平子南都賦若其厨饌則有華薌重秬濁臯香粳

今日忽不樂折盡園中花園中亦何有芍藥裊殘葩久

早復遭雨紛披亂泥沙不折亦安用折去還可嗟棄擲
亮未能送與謫仙家還將一枝春插向兩髻了

陸凱寄梅詩江南無所有贈一枝春按公詩特借用其字故爾不拘歐陽公詩小婢立我前赤腳兩髻了

和孫莘老次韻

去國光陰春雪消還家蹤迹野雲飄功名正自妨行樂
迎送纔堪博早朝雖去友朋親吏卒却辭讒謗得風謠
今年我亦江南去不問繁雄與寂寥

晉向秀傳秀注莊子嵇康曰此書詎復須注正自妨人作樂耳白樂天詩昏昏一覺睡不博蚤朝人後漢李邵

傳和帝分遣使者各
至州縣觀採風謠

游張山人園

壁間一軸煙蘿子
盆裏千枝錦被堆
慣與先生為酒伴
不嫌刺史亦顏開
纖纖入麥黃花亂
颯颯催詩白雨來
聞道君家好井水
歸軒乞得滿鉶回

唐楊巨源看花詩
一林堆錦映千燈
王注煙蘿子今所
畫修養者多有之
錦被堆一名粉團
兒花如月桂而小
粉紅或微黃色枝
柯纖長高丈餘往
往作架承之司空
圖郊園詩遠樹連
村暗黃花入麥稀
杜子美詩片雲頭
上黑應是雨催詩
白樂天詩赤日聞
白雨陰晴同一川

杜介熙熙堂

崎嶇世路最先回
窈窕華堂手自開
咄咄何曾書怪事
熙熙長覺似春臺
白砂碧玉味方永
黃紙紅旗心已灰
遙想閉門投轄飲
鷗絃鐵撥響如雷

王文考靈光殿賦旋室嫋娟以窈窕咄咄用殷浩事已見十一卷和趙郎中詩注老子衆人熙熙如享太牢如登春臺神仙傳殷七七每醉歌曰琴彈碧玉調鑪養白朱砂白樂天詩紅旗破賊非吾事黃紙除書無我名投轄陳遵事詳八卷和蘇州太守詩注鷗絃鐵撥開元賀懷知事已見八卷古纏頭曲注唐文宗時內庫有二琵琶號大忽雷小忽雷五代史補馮道之子能彈琵琶以皮為弦世宗號繞殿雷

次韻答劉涇

吟詩莫作秋蟲聲天公怪汝鉤物情使汝未老華髮生
芝蘭得雨蔚青青何用自燔以出馨細書千紙雜真行
新音百變口如鶩異義蠱起弟子爭舌翻濤瀾卷齊城
萬卷堆胸兀相撐以病為樂子未驚我有至味非煎烹
是中之樂吁難名綠槐如山閣廣庭飛蟲繞耳細而清
敗席展轉卧見經一作驚亦自不一作不自嫌翠織成意行信
足無溝坑不識五郎呼作卿吏民哀我老不明相戒無

復煩鞭刑時臨泗水照星星微風不起鏡面平安得一
舟如葉輕卧聞郵籤報水程尊羹羊酪不須評一飽且
救饑腸鳴

漢兩龔傳薰以香自燒膏以明自消法書苑晉世以來
工書者多以行書著名兼真者謂之真行帶草者謂之
行草劉伯倫酒德頌陳說禮法是非逢起漢蒯通傳
生掉三寸舌下齊七十餘城詩國風輾轉伏枕杜子美
張舍人遺襦段詩客從西北來遺我翠織成唐宋璟傳
每宴朝堂張易之昌宗列卿三品璟階六品居下座易
之諂事璟虛位揖曰公第一人何下座璟曰才劣品卑
卿何謂第一是時朝廷以易之內寵不名其官呼易之
五郎昌宗六郎鄭善果謂璟曰公奈何謂五郎為卿璟
曰以官正當為卿君非其家奴何郎之云後漢馬援傳

頗哀老子使得遨遊唐徐有功傳為蒲州司法參軍為政仁不忍杖罰民服其恩更相約曰犯徐參軍杖者必斥之謝靈運南亭詩戚戚感物歎星星白髮垂杜子美青草湖詩宿漿依農事郵藏報水程蓴羹羊酪見七卷金門寺中詩注陶淵明詩傾身營一飽韓退之詩饑腸徹死無由鳴

攜妓樂游張山人園

大杏金黃小麥熟墮巢乳鵲拳新竹故將俗物惱幽人
細馬紅粧滿山谷提壺勸酒意雖重杜鵑催歸聲更速
酒闌人散却關門寂歷斜陽挂疎木

晉王戎傳俗物已復來敗人意李白對酒歌二八佳人細馬馳青黛畫眉紅錦靴

種德亭

并引

處士王復家於錢塘為人多技能而醫尤精期於
活人而已不志於利築室候潮門外治園圃作亭
榭以與賢士大夫游惟恐不及然終無所求人徒
知其接花蓺果之勤而不知其所種者德也乃以
名其亭而作詩以遺之

小圃旁城郭閑門芝朮香名隨市人隱德與佳木長元
化善養性倉公多禁方所活不可數相逢旋相忘但喜

賓客來置酒花滿堂我欲東南去再觀雙檜倉山茶想
出屋湖橘應過牆木老德亦熟吾言豈荒唐

唐詩水淨苔莎色露香芝朮苗後漢華佗傳字元化曉
養生之術年且百歲而有壯容史記扁鵲倉公傳太倉
公姓淳于氏名意少而喜醫方術師元里公乘陽慶悉
以禁方予之史記貨殖傳十歲樹之以木百歲來之以
德莊子天下篇繆悠之說荒唐之言

文與可有詩見寄云待將一段鵝谿絹掃取寒
梢萬尺長次韻答之

為愛鵝谿白靈光掃殘雞距紫毫鉞世間那有千尋竹

月落庭空影許長

茶錄蜀東川鵝谿出畫絹作羅底佳白樂天雞距筆賦足之健者雞足毛之勁者兔毛就足之中奮發者利距在毛之內秀出者長毫合為乎筆正得其要

聞辯才法師復歸上天竺以詩戲問

道人出山去山色如死灰白雲不解笑青松有餘哀忽聞道人歸鳥語山容開神光出寶髻法雨洗浮埃想見南北山花發前後臺寄聲問道人借禪以為詼何所聞而去何所見而回道人大笑不答此意安在哉昔年本不

佳今者亦無來此語竟非是且食白楊梅

盧仝月蝕詩青山死灰色莊子盜跖篇孔子下車色若死灰楞嚴經世尊從肉髻中涌百寶光光中涌出千葉寶蓮白樂天寄上天竺詩前臺花發後臺見上界鐘聲下界聞晉嵇康傳與向秀鍛於大樹下鍾會往造焉康不為禮而鍛不輟久之會去康謂曰何所聞而來何所見而去會曰聞所聞而來見所見而去金剛經應生無所住心若心有住則為非住又阿那含名為不來而實無不來凡戶雖錄鄭虔云越州客山有白楊梅杭州圖經楊梅塢在南山近瑞峰楊梅尤盛有紅白二種今杭人呼白者為聖僧梅

和子由送將官梁左藏仲通

雨足誰言春麥短城堅不怕秋濤卷日長惟有睡相宜

半脫紗巾落紉扇芳草不鋤當戶長珍禽獨下無人見
覺來自世都是夢坐久枕痕猶著面城西忽報故人來
急掃風軒炊麥飯公自注徐州所出伏波論兵初矍鑠中散談
仙更清遠南都從事亦學道不卹腸空誇腦滿問羊他
日到金華應許相將游閬苑

蜀志周羣傳先主將誅張裕諸葛亮表請其罪答曰芳
蘭生門不得不鋤謝承後漢書李固為太守食麥飯後
漢馬援傳劉尚擊武陵五谿蠻軍沒援請行帝愍其老
援據鞍顧盼以示可用帝笑曰矍鑠哉是翁也援為伏
波將軍晉嵇康傳嵇康仕魏為中散大夫常修養性服
食之事以為神仙藥之自然非學所得至於導養得理

則安期彭祖之壽可及乃著養生論王注南都從事謂
子由也時子由從張文定僉書南京判官嘗云學道三
十年今始麤聞道也道家口訣欲得不死腸中無滓欲
得不老還精補腦神仙傳黃初平家使牧羊有道士將
至金華山石室中其兄尋索見之問羊何在初平叱白
石俱起成羊兄曰道可學否初平曰唯好即得兄乃棄
家服茯苓五萬日遂得仙集仙錄西王母居閬風之苑
東方朔十洲記崑崙崙山三角其一正北干辰星之輝名
閬風

次韻秦觀秀才見贈秦與孫莘老李公擇甚熟

將入京應舉

秦觀高郵人初字
太虛後改字少游

夜光明月非所投逢年遇合百無憂將軍百戰竟不侯

伯郎一斗得涼州，翹關負重非無力。十年不入紛華域，
故人坐上見君文。謂是古人吁，莫測新詩說盡萬物情。
硬黃小字臨黃庭，故人已去君未到。空吟河畔草青青，
誰謂他鄉各異縣。天遣君來破吾願，一聞君語識君心。
短李髯孫眼中見，江湖放浪久全真。忽然一鳴驚倒人，
縱橫所值一作往無不可。知君不怕新書新，千金敝帚那
堪換。我亦淹留豈長算，山中既未決同歸。我聊爾耳，君
其漫。

漢鄒陽傳明月之珠夜光之璧以闇投人於道衆莫不
按劍相盼史記佞幸傳力田不如逢年善仕不如遇合
漢李廣傳與望氣王朔語曰自漢擊匈奴廣未嘗不在
其中終無尺寸功以得封邑豈吾相不侯耶三輔決錄
孟佗字伯郎一斗涼州注見一卷和劉長安題薛周逸
老亭唐選舉志武后長安二年始置武舉有馬槍翹闌
負重身材之選唐書員半千傳武后謂半千曰久聞爾
名謂為古人乃在朝邪王注公言嘗於祕書閣觀王羲
之墨蹟皆唐人硬黃紙臨本惟鵝羣一帖似羲之真筆
古樂府飲馬長城窟行青青河畔草縣縣思遠道又他
鄉各異縣展轉不相見世說郝超為桓溫參軍王珣為
主簿府中語曰髯參軍短主簿衛按短李謂公擇髯孫
謂莘老借用李紳孫會稽事耳舊注非嵇叔夜詩志在
守樸養素全真史記楚世家莊王曰三年不蜚蜚將冲
天三年不鳴鳴將驚人唐王勃傳李嶠宋之問之文如
良金美玉無施不可三國魏武帝紀自作兵書十餘萬

言諸將征伐皆以新書從事王注新書言王介甫新學經義之說也魏文帝典論夫人難於自見而文非一體鮮能備善是以各以所長相輕所短里語曰家有敝帚享之千金不自見之患也晉阮咸傳未能免俗所復爾耳唐元結傳自稱浪士及有官人以為浪者亦漫為官乎又曰公漫久矣可以漫為叟

僕曩於長安陳漢卿家見吳道子畫佛碎爛可

惜其後十餘年復見之於鮮于子駿家則已裝

背完好子駿以見遺作詩謝之

米元章畫史云蘇子瞻家收吳

道子畫佛及侍者誌公十餘人破碎甚而當面一手精彩動人點不加墨口淺深暈成故

最如活元章所記即此畫也

貴人金多身復閑爭買書畫不計錢已將鐵石充逸少

公目注法帖大王書中有殷鐵石字鐵石梁武帝時人

更補朱繇為道元

公目注世所收

吳道子畫多朱繇筆也

煙薰屋漏裝玉軸鹿皮蒼壁知誰賢吳生

畫佛本神授

一作駿

夢中化作飛空仙覺來落筆不經意

神妙獨到秋毫顛昔我長安見此畫歎息至寶空潛然

素絲斷續不忍看已作蝴蝶飛聯翩君能收拾為補綴

體質散落嗟神全誌公髣髴見刀尺修羅天女猶雄妍

如觀老杜飛鳥句脫字欲補知無緣問君乞得良有意

欲將俗眼為洗煎貴人一見定羞忤錦囊千紙何足捐
不須更用博麻縷付與一炬隨飛煙

尚書故實千字文梁周興嗣編次而有王右軍書者乃
梁武教諸王書令殷鐵石於大王書中搗一千字不重
者每字片紙雜碎無序武帝召興嗣韻之書畫補遺朱
繇長安人工畫佛道米元章畫史真絹色淡雖百破而
色明白精神彩色如新惟佛像多經香煙薰損本色書
范願魯公與懷素同學草書於郭兵曹或問張長史見
公孫大娘舞劍器始得低昂回翔之狀兵曹亦有之乎
懷素以古釵腳對魯公曰何如屋漏痕漢書食貨志武
帝造白鹿皮幣令王侯朝覲必以薦璧顏異曰今王侯
朝賀以蒼璧直數千而其皮薦反四十萬奉末不相稱
小說一道人為戲術碎翦絹作蝴蝶而飛少選復如故
或藏其一蝶絹亦虧如蝶之大傳燈錄寶誌禪師金城

人姓朱氏常執錫杖頭鏤剪刀尺銅鑑歐陽詩話陳從
易舍人偶得杜詩舊本至送蔡都尉詩云身輕一鳥其
下脫一字數客各用一字補之或云疾或云落或云下
後得完本乃過字陳數曰一字莫能到也王注博麻縷
似祖語麻
三斤之類

雨中過舒教授

舒名煥字堯夫公守
徐堯夫時為教授

疎疎簾外竹瀏瀏竹間雨
牕扉靜無塵几硯寒生霧
美人樂幽獨有得緣無慕
坐依蒲褐禪起聽風甌語
客來
淡無有灑掃涼冠屨濃茗
洗積昏妙香淨無慮歸來
北
堂閣一一微螢度此生憂
患中一餉安閑處飛鷺悔
前

笑黃犬悲晚悟自非陶靖節誰識此間趣

杜子美詩心清聞妙香陶淵明詩此間有真趣欲辨已忘言飛鵞黃犬注並見前

次韻舒教授寄李公擇

草書妙絕吾所兄真書小低猶抗行論文作詩俱不敵

看君談笑收降旌去年逾月方出書

公自注子去年留齊月餘為君

劇飲幾濡首今年過我雖少留寂寞陶潛方止酒

公自注此

行公擇病酒夕不飲別時流涕攬君鬢懸知此懽墮空虛松下縱

橫餘屐齒門前輾輓想君車怪君一身都是德近之清

潤淪肌骨細思還有可恨時不許藍橋見傾國

公自注
公擇有

婢名雲英屢
欲出不果

晉王羲之傳每自稱我書比鍾繇當抗行比張芝草猶
雁行也華嶠譜序華歆能劇飲石餘不亂周易未濟有
孚于飲酒無咎濡其首象曰飲酒濡首亦不知節也陶
潛止酒詩始覺止為善今朝真止矣裴琨傳奇長慶間
裴航傭舟襄漢同舟有樊夫人者國色也航以詩及珍
果獻夫人以詩答曰一飲瓊漿百感生元霜杵盡見雲
英藍橋便是神仙窟何必崎嶇上玉京後航歸輦下經
藍橋驛因渴乞漿于茅舍果遇雲英遂娶之後同得仙
去

又送鄭戶曹

鄭戶曹名僅字彥能彭
城人是時為冠氏令

水繞彭城樓山圍戲馬臺古來豪傑地千歲有餘哀
隆準飛上天重瞳亦成灰白門下呂布大星隕臨淮尚想
劉德輿置酒此徘徊爾來苦寂寞廢圃多蒼苔河從百
步響山到九里回山水自相激夜聲轉風雷蕩蕩清河
壖黃樓我所開秋月墮城角春風搖酒杯遲去聲君為坐
客新詩出瓊瑰樓成君已去人事固多乖他年君倦游
白首賦歸來登樓一長嘯使君安在哉

漢高祖隆準而龍顏史記項羽贊舜目蓋重瞳子項羽
亦重瞳子後漢呂布傳自號徐州牧曹操攻之布登白

門樓攻圍之急乃下鄜道元水經注沛南門謂之白門
唐李光弼傳封臨淮郡王復歸徐州遇疾薨杜子美武
衛將軍挽詞嚴警當寒夜前軍落大星南史宋高祖諱
裕字德興小字寄奴姓劉氏初封宋公居彭城嘗九日
讌戲馬臺韋應物詩水性自云靜石中本無聲如何兩
相激雷轉空山鳴秦太虛黃樓賦序太守蘇公守彭城
之明年既治河決之變民以更生又因修繕其城作黃
樓於東門之上以為水受制於土而土之色黃故取名
焉晉劉琨傳在晉陽為胡騎所圍城中窘琨
乃乘月登樓清嘯賊聞之悽然棄圍而走

次韻黃魯直見贈古風二首

黃魯直名庭堅分
寧人與張文潛秦

少游晁無咎俱出蘇門天下號元祐四學士
而魯直之名幾配東坡故稱蘇黃云附魯直
古詩一曰江梅有佳實託恨桃李場桃李終
不言朝露借恩光孤芳忌皎潔冰雪空自香

古來和鼎實此物升廟廊歲月坐成晚煙雨
青已黃得升桃李盤以遠初見嘗終然不可
口擲棄官道傍但使本根在棄捐果何傷二
曰青松出洞壑十里聞風聲上有百尺絲下
有千歲苓小草有遠志相依在平生醫和不
並世深根且固蒂人言可醫國何用大旱計
小天才則殊
氣味固相似

嘉穀卧風雨狼莠登我場陳前漫方丈玉食慘無光大
哉天宇閒美惡更臭香君看五六月飛蚊殷回廊茲時
不少假俛仰霜葉黃期君蟠桃枝千歲終一嘗顧我如
苦李全生依路旁紛紛不足愠悄悄徒自傷

杜子美詩天涯歌滯雨稂稻卧不翻又病橘詩此物歲
不稔玉食失光輝莊子知北遊神奇復化為臭腐臭腐
復化為神奇詩國風殷其雷山海經東海有山名度索
上有大桃蟠屈三千里名蟠桃晉王戎傳嘗與羣兒戲
道側見李樹多實等輩趣之戎獨不往或問故曰樹在
道邊而多子必苦李也取之信然詩國風憂心悄悄愠
于羣小公烏臺詩話北京國子監教授黃庭堅寄書一
封并古詩二首與軾依韻和答云嘉穀卧風雨至玉食
慘無光以譏今之小人勝君子如根莠之奪嘉穀又云
天哉天宇間至悄悄徒自傷意言君子小人進退有時
如夏月蚊虻縱橫至秋自息比黃庭堅於蟠桃進必遲
自比若李以無用全生又取詩云愠于羣小以譏諷當
今進用之人
皆小人也

空山學仙子妄意笙簫聲千金得奇藥開視皆稀苓不

知市人中自有安期生今君已度世坐閱霜中帶摩挲
古銅人歲月不可計閨風安在哉要君相指似

李太白鳳笙篇仙人十五愛吹笙學得崑丘彩鳳鳴韓
退之進學解嘗醫師以昌陽引年欲進其弭苓也史記
封禪書李少君曰安期生琅玕仙人者通蓬萊中合則見人不
合則隱列仙傳安期生琅玕人賣藥東海邊時人皆言
千歲公楚辭遠遊章欲度世以忘歸意恣睢以担橋摩
挲銅人後漢薊子訓事詳見十二卷子由將赴南都詩
注閨風注
見本卷

次韻答舒教授觀余所藏墨

異時長笑王會稽野鷺臙腥汗刀几暮年卻得庾安西

自厭家雞題六紙二子風流冠當代顧與兒童爭愠喜
秦王十八已龍飛嗜好晚將蛇蚓比我生百事不挂眼
時人繆說云工此世間有癖念誰無傾身障簾尤堪鄙
一生當著幾緡屐定心肯為微物起此墨足支三十年
但恐風霜侵髮齒非人磨墨墨磨人餅應未罄墨先恥
逝將振衣歸故國數畝荒園自鋤理作書寄君君莫笑
但覓來禽與青李一螺點漆便有餘萬竈燒松何處使
君不見永寧第中擣龍麝列屋閑居清且美倒壘連眉

秀嶺浮雙鴉畫簷香雲委時聞五斛賜蛾綠不惜千金
求獺髓聞君此詩當大笑寒牕冷硯冰生水

庾翼家雞注再見柳子厚集殷贇戲批書後寄劉連州
詩注云家有右軍書每紙背庾翼題云王會稽六紙二
月三十日晉書王羲之終會稽內史庾翼嘗為安西將
軍荊州刺史唐太宗紀武德元年進封秦王春蠅秋蛇
本王羲之傳後制為唐太宗撰詳見十二卷和流盃石
上詩注按晉書太宗自著宣武二帝陸機王羲之四論
於是總題御撰云白樂天七德歌太宗十八舉義兵白
旄黃鉞定兩京世說祖士少好財阮遙集好屐同是一
累而未判其得失人有詣祖見料視財物客至屏當未
盡餘兩小簾著背後傾身障之意未能平或有詣阮見
自吹火蠟屐因歎曰未知一生當著幾兩屐神色閑暢
於是勝負始分蔡君謨墨說徐鉉云嘗得李超墨一挺

與弟錯共用十年乃盡王注公嘗曰吾有佳墨七十九而求之不已不近愚耶石昌言蓄墨不許人磨或曰子不磨墨墨當磨子昌言墓木拱矣墨故無恙詩小雅錡之鑿矣維墨之恥淳化法帖大王書四百六十五帖其一云青李來禽櫻桃日給藤子皆蒙盛為佳函封多不生足下所疏云此果佳可為致子當種之此種彼胡桃皆生也此號青李來禽帖蕭子良與王僧虔書仲將之墨一點如漆又陸雲與兄書一日上三臺曹公藏石墨數十萬斤今送一螺溫庭筠詩塢麝成塵香不滅法書苑歐陽通矜其書必以松煙為墨末以真麝唐永寧里王涯第也或云李駙馬第今士大夫家有墨其上有永寧賜第四字即是也意或用此韓退之送李愿序粉白黛綠者列屋而閒居東齋記事蜀有大慈寺壁畫明皇按樂十眉圖倒暈眉名西京雜記文君眉常如遠山李賀美人梳頭歌纖手卻盤老鴉色翠滑寶釵簪不得杜牧之閨情詩娟娟卻月眉新鬢學鵲飛南部煙花記隋

煬帝鳳舸殿脚女吳絳仙善畫長蛾眉帝悅之由是爭
為長蛾司宮吏日供螺子黛五斗號蛾綠螺酉陽雜俎
吳孫和醉舞如意悞傷鄧夫人頰
醫以白獺髓和玉屑以滅瘢痕

送鄭戶曹賦席上果得榘子

彼美玉人果粲為金槃實瘴霧脫蠻溪清樽奉佳客客
行何以贈一語當加璧祝君如此果德膏以自澤驅攘
三彭仇已我心腹疾願君如此木凜凜傲霜雪斲為君
倚几滑淨不容削物微興不淺此贈毋輕擲

王注榘子出信州玉山縣以懷玉山得名禮記束帛加
璧為德也左傳成二年韓厥執繫馬前再拜奉觴加璧

以進宣室志彭者三尸之姓學仙者當先絕三尸本草
推實去三蟲行榮衛史記范睢傳秦之有韓如不之有
蠱人之有腹心之病也晉王羲之傳嘗詣門生家見棊
兒滑淨因書之真草相半後為其父誤刮去生驚懼者
累日杜子美詩物微
意不淺感動一沈吟

送胡掾

亂葉和淒雨投空如散絲流年一如此遊子去何之節
義古所重艱危方自茲他年著清德仍復畏人知

張戴雜詩騰雲似湧煙密雨如散絲清畏人
知晉胡質事詳見五卷和沈立之留別詩注

答仲屯田次韻

秋來不見漢陂岑千里詩盟忽重尋
大木百圍生遠籟朱絃三歎有遺音
清風卷地收殘暑素月流天掃積陰
欲遣何人賡絕唱滿塔桐葉候蟲吟

杜子美詩岑參兄弟皆好奇攜我遠來游
漢陂左傳哀十二年吳子使宰嚭請尋盟
莊子齊物論大木百圍之竅穴冷風則小
和飄風則大和厲風濟則衆竅為虛地籟
則衆竅是已史記樂書清廟之瑟朱絃而
疏越一倡而三歎有遺音者矣謝希逸月賦
白露暖空素月流天宋書謝靈運傳論平
子艷發文以情變絕唱高蹤久無嗣響
柳子厚詩碧空殘月曙門掩候蟲吟

密州宋國博以詩見紀在郡雜詠次韻答之

吾觀二宋文字字字照繖素淵源皆有考奇嶮或難句後
來邈無繼嗣子其殆庶胡為尚流落用舍真有數當時
苟悅可慎勿笑杖杜斲牕誰赴抃袖手良優裕山城辱
吾繼缺短煩遮護昔年繆陳詩無人聊瓦注于今賡絕
唱外重中已懼何當附家集擊壤追咸護

二宋宋郊宋祁也國博乃其嗣子漢董仲舒傳贊考其
師友淵源有漸北夢瑣言貫休見蜀待詔常重唐傳神
曰可謂前無來人後無繼者法華經言辭柔軟悅可衆
心舊唐書李林甫傳林甫典選選人嚴迴判語用杖杜
二字林甫不識秋字謂韋陟此云杖杜何也陟俛首不
敢言朝野僉載唐楊滔為中書舍人時促命草制而吏

持門鑰他適無舊本可檢乃斲牕取之時號斲牕舍人
輯退之蔡柳子厚文巧匠旁觀縮手袖間嵇叔夜與山
巨源絕交書仲尼不假蓋於子夏護其短也莊子達生
篇以瓦注者巧以鉤注者憚以黃金注者璠凡外重者
內拙周禮大司樂以樂舞教國子舞大
咸大濩鄭氏注大咸堯樂大濩湯樂也

答范淳甫

范淳甫名祖禹成都華陽人公自
注來詩有張僕射李臨淮之句

吾州下邑生劉季誰數區區張與李重瞳遺迹已塵埃
惟有黃樓臨泗水公自注郡有聽事俗謂之霸王聽
相傳不可坐僕拆之以蓋黃樓而

今太守老且寒俠氣不洗儒生酸猶勝白門窮呂布欲
將鞍馬事曹瞞

漢高祖紀姓劉字季沛豐邑中陽里人也唐張建封貞元四年拜徐泗節度使檢校尚書右僕射李光弼封臨淮郡王後歸徐州過疾薨竝見本傳九域志徐州泗水今呼為清河水經云泗之別名又泗水亭漢高祖嘗為亭長魏志呂布傳曹操攻之自白門樓下降布請操曰明公所患不過於布今已服矣今布將騎明公將步天下不足定也

次韻答王定國

每得君詩如得書宣心寫妙書不如眼前百種無不有知君一以詩驅除傳聞都下十日雨青泥沒馬街生魚舊雨來人今不來悠然獨酌卧清虛我雖作郡古云樂

山川信美非吾廬願君不廢重九約念此哀冷勤呵噓
劉禹錫酬樂天詩兩傳千里意書札不如詩杜子美秋
述杜子卧病長安旅次多雨生魚青苔及榻常時車馬
之客舊雨來今雨不來唐馬周傳舍新豐逆旅主人不
之顧命酒一斗八升悠然獨酌清虛定國堂名王粲登
樓賦雖信美
而非吾土

芙蓉城

世傳王迴子高與仙人周瑤英游芙蓉城元豐元
年三月余始識子高問之信然乃作此詩極其情
而歸之正亦變風止乎禮義之意也

胡徽之作王子高芙蓉城傳略王迴字子高虞部員外郎正路之次子初遇一女自言周太尉女語王曰我於人間嗜欲未盡緣以冥契當時巾幘是以奉尋非一朝一夕之分也又王初見周懼不敢寢更深困甚視牕戶掩闌及入解衣聞屏幃間有喘息聲乃適女郎已脫衣而卧天明已不見餘香不散自是朝去夕至凡百餘日又周云即預朝列王曰朝帝耶不言其詳由此候去不來者數日忽一夕夢周道服而至謂王曰我居幽僻君能一往否喜而從之但覺其身飄然與周同舉須臾過一嶺及一門珍禽佳木清流怪石殿閣金碧相照遂與王自東箱門入循廊至一殿亭甚雄壯下有三樓相視而聳亦甚雄麗廊間半開周忽入王少留須臾周與一女郎至周曰三山之事息乎曰雖已息奈情何於是拊掌而去逡巡東廊之門啟有女流道裝而出者百餘人立於庭下俄聞殿上卷簾

有美丈夫一人朝服憑几而庭下之女循次而上
少頃憑几者起簾復下諸女流亦復不見周遂命
王登東廂之樓上有酒具憑欄縱觀山川清秀梁
上有碑題曰碧雲其字則真誥八龍雲篆王未及
下一女郎復登是樓年可十五容色嬌媚亦周之
比周曰此芳卿也與我最相愛芳卿蓋其字耳夢
之明日周來王語以夢周笑曰芳卿之意甚勤也
王問何地周曰芙蓉城也曰憑几者誰三山之事
何謂周皆不對問芳卿何姓曰與我同王感其事
作詩遺周云又虞曹公狀其事以奏帝春花秋月
悽悽悲泣而去周臨別留詩云久事屏幃不暫閑
今朝離意尚闌珊臨行惟有相思淚滴在羅衣一
半斑按芙蓉城傳施氏注散入句下王注錄之亦
不詳蘅未見全傳又無他本可校茲從施氏句注
中掇拾出之未免句字脫落殘闕多有而先生
是詩大概採用其意不可略也乃附著之如此

芙蓉城中花冥冥誰其主者石與丁珠簾玉按翡翠屏
雲舒霞卷千僂停中有一人長眉青炯如微雲澹疎星
往來三世空鍊形竟坐誤讀黃庭經天門夜開飛爽靈
無復白日乘雲輶俗緣千劫磨不盡翠被冷落淒餘馨
因過緱山朝帝廷夜聞笙簫弭節聽飄然而來誰使令
皎如明月入牕櫺忽然而去不可執寒衾虛幌風泠泠
仙宮洞房本不扃夢中同躡鳳皇翎徑度萬里如奔霆
玉樓浮空聳亭亭天書雲篆誰所銘遶樓飛步高崙嶙

仙風鏘然韻流鈴
蘧蘧形開如醉醒
芳卿寄謝空丁寧
一朝覆水不返餅
羅巾別淚空熒熒
春風花開秋葉零
世間羅綺紛臙腥
此身流浪隨滄溟
偶然相值兩浮萍
願君收視觀三庭
勿與嘉穀生蝗螟
從渠一念三千齡
下作人間尹與邢

杜子美詩樹橈離思花冥冥歐陽公詩話石曼卿卒後
其故人有見之者言我今為仙也所主芙蓉城張師正
括異志慶歷中有朝士冒晨起起居通衢見美婦三十
餘人竝馬而行若前導者俄見丁觀文度按轡繼之而
去有一人最後行朝士問曰觀文將游何處曰非也諸
女御迎芙蓉館主時丁已在告頃之聞卒襄陽記龍巢

山鋒帽峰尹喜石室內有玉案仙經八卷在案上三輔黃圖未央宮漸臺西有兩桂宮中有光明殿皆金玉珠璣為簾箔韓退之華山女詩洗粧拭面著冠帔白咽紅頰長眉青孟浩然詩微雲澹河漢疎雨滴梧桐酉陽雜俎有人掘地遇石函發之見一人方偃仰容色如生須臾振髮而起即失所在方士云此太陰鍊形人也吳筠步虛詞稟化凝正氣鍊形為真仙集仙錄謝自然日誦黃庭經十遍誦時有童子侍立每十遍即將向上界去東華夫人曰誦經先讀外篇大都精思誦讀者獲福麤行者獲罪盧仝詩天門九重高崔嵬夜半祭醮夜半開太微靈書人有三魂一曰爽靈二曰台光三曰幽精南史鄧先生傳白日神仙魏夫人忽來臨降曰君有仙分所以故來裴嗣封陟傳雲輅既去牕戶遺芳劉向列仙傳王子喬周靈王太子也好吹笙道士浮邱公接上嵩山後三十餘年來山中告桓良曰告我家七月七日待我於緱氏山頭果乘白鶴駐山頭舉手謝時人而去楚

詞抑志而弭節兮注按節徐行也江淹擬悼婦詩明月
入綺牕彷彿想蕙質王注自天門夜開至風泠泠以言
周初至時事宋玉神女賦其少進也皎如明月舒其光
杜子美薛判官詩自云帝李女嘆雨鳳皇翎東方朔十
洲記崑崙山上有玉樓十二唐韻伶俦通作吟瞬度人
經擲火萬里流鈴八衝吳筠步虛詞豁落制六天流鈴
威百魔莊子齊物論俄然覺則遽遽然周也注已見又
其寐也神交其覺也形開後漢何進傳覆水不收悔將
何及李太白妾薄命行雨落不上天水覆難重收元微
之鶯鶯傳熒熒然猶瑩於茵席白樂天長恨歌春風桃
李花開夜秋雨梧桐葉落時黃庭內景三庭佳穀生蝗
螟王注此所謂歸之正也三庭道家事佳穀生蝗螟言
色慾之賊身如蝗螟之賊佳穀也楊妃外傳由此一念
當復墮下界神仙傳馬明先生隨神女還岱見安期生
語神女曰昔與女郎游於安息西海之際憶此已三千
年矣史記外戚世家漢武帝尹夫人邢夫人同時竝幸

或云尹喜邢和璞王注正是二
夫人耳謂彼自墮落勿效尤也

和鮮于子駿鄆州新堂月夜二首

公自注前次
韻後不次

去歲游新堂春風雪消後池中半篙水池上千尺柳佳
人如桃李胡蝶入衫袖山川今何許疆野一作界已分宿

歲月不可思駛若船放溜繁華真一夢寂寞兩榮朽惟
有當時月依然照杯酒應憐船上人坐穩不知漏

曹子建詩南國有
佳人容華若桃李

明月入華池反照池上堂堂中隱几人心與水月涼風

螢已無迹露草時有光起觀河漢流步屣響長廊名都
信繁會千指調絲簧先生病不飲童子為燒香獨作五
字詩清絕如韋郎詩成月漸側皎皎兩相望

蘇州圖經響廊以板梓板藉其地西子行則有聲因
名韋郎韋蘇州應物也白樂天稱其五言尤高閑雅淡
自成一家已見十二卷詩注杜子美詩浩
歌淶水曲清絕聽者從詩國風月出皎兮

送將官梁左藏赴莫州

王注莫州文安郡理鄭
縣唐開元中以鄭字類

鄭改為莫乃公
孫贐之易京也


燕南垂趙北際其間不合大如礪至今父老哀公孫烝

土為城鐵作門城中積穀三百萬猛士如雲驕不戰一
旦鼓角鳴地中帳下美人空掩面豈如千騎平時來笑
譚譽欵生風雷葛巾羽扇紅塵靜投壺雅歌清燕開東
方健兒虓虎樣泣涕懷思廉耻將彭城老守亦淒然不
見君家雪兒唱

後漢公孫瓚傳瓚禽劉虞盡有幽州之地前此有童謡
曰燕南垂趙北際中央不合大如礪唯有此中可避世
瓚以為易地當之遂徙鎮焉盛修營壘樓觀慮有非常
乃居高京以鐵為門斥去左右男人專侍姬妾其文簿
書記皆汲而上之令婦人習為大聲以傳宣教令謀臣
猛將稍有乖散自此之後希復攻戰或問其故瓚曰今

兵革方始觀此非我所決不如休兵力耕積穀三百萬斛足以待天下之變建安三年袁紹復大攻瓚瓚遺子續書曰袁氏之攻狀如鬼神梯衝舞吾樓上鼓角鳴於地中及戰敗乃悉縊其姊妹妻子然後引火自焚晉載記赫連勃勃起都城蒸土築之錐入一寸即殺作者而并築之古樂府羅敷行東方千餘騎夫婿居上頭語林諸葛武侯白葛巾持羽扇指麾三軍後漢蔡邕傳取士必用儒術對酒設樂必投壺雅歌魏志呂布傳謂曹性曰卿健兒也杜子美哀王孫詩朔方健兒好身手詩大雅進厥虎臣闕如虓虎杜子美遣興詩安得廉恥將三軍同晏眠王注東方健兒則梁左藏所替罷處故懷思之也唐李密有寵姬名雪兒每賓客有新製必令雪兒之

歌



施註蘇詩卷十四

欽定四庫全書

集部

施註蘇詩卷十五
六

詳校官庶吉士_臣李傳熊

檢討_臣何思鈞覆勘

覆校官中書_臣宋 鎔

校對官主事_臣龔敬身

謄錄監生_臣范 墉

謄錄監生_臣范鳴謙

欽定四庫全書

施註蘓詩卷十五

宋 蘓軾 撰

施元之原註

武進邵長衡刪補

詩四十二首

時守彭
城作

次韻子由送趙屺歸觀錢塘遂赴永嘉

趙屺字
景仁清

獻公子由蔭登

第通判溫州

歸舟轉河曲稍見楚山蒼候吏來迎客吳音已帶鄉言
從謝康樂先獻魯靈光已擊三千里何須四十強風流
半刺史清絕校書郎到郡詩成集尋谿水濺裳芒鞋隨
採藥蠶紙記流觴海靜蛟鼉出山空草木長宦游無遠
近民事要更嘗願子傳家法他年請尚方

南史謝靈運襲封康樂公為永嘉太守郡有各山水肆
意遊遨謝承後漢書王延壽有雋才父逸欲作魯靈光
殿賦令延壽往錄其狀延壽因韻之以簡其父父曰吾
無以加也時蔡邕亦有此作十年不成見延壽賦遂隱

而不出莊子逍遙游鵬之徙於南冥也水擊三千里禮
記四十曰強而仕舊唐書蕭倣傳昔庾亮與郭游書別
駕舊與刺史別乘任居刺史之半安可非其人也唐百
官志校書郎正九品主掌讐校典籍刊正文章南史王
筠每一官成一集文房四譜右軍蘭亭帖用蠶蠶紙鼠
須筆書又蘭亭序清流激湍映帶左右引以為流觴曲
水列坐其次漢朱雲傳願賜尚方斬馬劍斷佞臣一人
頭詳見十二卷次韻荅邦直子由闕詩註按公作清獻
神道碑云為殿中侍御史彈劾
不避權倖京師號鐵面御史

中秋月三首

殷勤去年月潋灩古城東憔悴去年人卧病破牕中
徘徊巧相覓窈窕穿房櫳月豈知我病但見歌樓空

撫枕三歎息扶杖起相從天風不相哀吹我落瓊宮
白露入肺肝夜吟如秋蟲坐令太白豪化為東野窮
餘年知幾何佳月豈屢逢寒魚亦不睡竟夕相唼

宜檢

切
喁

李白月下獨酌詩我歌月徘徊我舞影凌亂韓退之記
夢詩隆樓傑閣磊嵬高天風飄飄吹我過張衡思玄賦
叫帝閭使闢扉兮覲天皇之瓊宮韓退之秋懷詩蟲弔
寒夜永又薦士詩有窮者孟郊受材實雄鷲郊字東野
說文唼喁魚口上出貌左太冲吳都賦沂泗順
流唼喁沈浮何諷夢渴賦鯢鯨唼喁相吻以四

六年逢此月五年照離別
公自註中秋有月凡六年
矣惟去歲與子由會於此歌

君別離曲滿坐為淒咽留都信繁麗此會豈易擲鎔銀
百頃湖挂鏡千尋闕三更歌吹罷人影亂清樾歸來北
堂下寒光翻露葉喚酒與婦飲念我向兒說豈知衰病
後空盞對梨栗但見古河東莼麥如鋪雪欲和去年曲
復恐心斷絕

留都子由時之官南京南京有留守司故云留都白樂
天詩冰消湖水銀為面風卷沙汀玉作堆韻注樾木陰
也韓退之詩妻孥恐我生悵望樂中不飭栗與梨白樂
天詩莼麥鋪花白又村夜詩月明莼麥花如雪鮑明遠
東門行涕零心斷絕將去復還訣

舒子在汶上閉門相對清

公自註舒煥試舉人鄆州

鄭子向河朔公自

註鄭僅赴北京戶曹

孤舟連夜行頻子雖咫尺如在牢局

公自註頻

起來徐試舉人

趙子寄書來水調有餘聲

公自註今日得趙果卿書猶記余在東武

中秋所作水調歌頭

悠哉四子心共此千里明明月不解老良辰

難合并回頭坐上人聚散如流萍嘗聞此宵月萬里同

陰晴

公自註故人史生為余言嘗見海賈云中秋有月則是歲珠多而圓賈人常以此候之雖相去萬里

他日會合相問則陰晴無不同者

天公自著意此會那可輕明年各相

望俯仰今古情

謝希逸月賦美人邁兮音塵闕隔千里兮共明
月鮑明遠翫月詩三五二八時千里與君同

中秋見月寄子由

明月未出羣山高瑞光萬丈生白毫一杯未盡銀闕涌
亂雲脫壞如崩濤誰為天公洗眸子應費明河千斛水
遂令冷看世間人照我湛然心不起西南大星如彈丸
角尾奕奕蒼龍蟠今宵注眼看不見更許螢火爭清寒
何人艤舟臨古汴千燈夜作魚龍變曲折無心逐浪花
低昂赴節隨歌板

公自注是夜賈客舟中放水燈

青瑩滅沒轉前山浪

颶風迴豈復堅明月易低人易散歸來呼酒更重看堂
前月色愈清好咽咽寒蛩鳴露草卷簾推戶寂無人
下咽啞惟楚老公自註近有一孫名楚老南都從事莫羞貧對月題
詩有幾人明朝人事隨日出恍然一夢瑤臺客

韓退之月蝕詩念此日月者為天之眼睛盧仝詩東方蒼龍角插戟尾搖風史記項籍傳烏江亭長艤船待注附船著岸也陸機文賦舞者赴節以投袂武元衡詩無因駐清景日出事還生盧子逸史許宣暴卒三日寤而作詩云曉入瑤臺露氣清坐中惟見許飛瓊李公垂鶯鶯歌恍然夢作瑤臺客

答王翬

公自註翬將見過有詩自謂惡客戲之

汴泗遠吾城城堅如削鐵中有李臨淮號令肝膽裂古
來彭城守未省怕惡客惡客云是誰祥符相公孫是家
豪逸生有種千金一擲頗黎盆連車載酒來不飲外酒
嫌其村子有千餅酒我有萬株菊任子滿頭插團團見
花不見目醉中插花歸花重壓折軸問客何所須客言
我愛山青山自遠郭不要買山錢此外有黃樓樓下一
河水美哉洋洋乎可以療饑并洗耳彭城之游樂復樂
客惡何如主人惡

杜詩大城鐵不如唐書李光弼傳寶應元年進封臨淮
郡王常鎮徐州郝廷玉傳魚朝恩聞其善布陣請觀之
廷王申號令鳴鼓角部伍坐作進退齊一曰此臨淮王
遺法也王善御軍每校旗不如令者輒斬由是人皆自
効而赴蹈馳突心破膽裂元次山詩有時逢惡客還家
亦少酣注非酒徒即為惡客祥符相公羣大父魏國文
正公也相真宗於景德祥符間漢陳勝傳侯王將相寧
有種乎李太白詩莫惜連船沽美酒千金一擲買春芳
韓退之詩豁呀鉅壑頗黎盆張平子南都賦騰酒車而
斟酌注以車載酒也杜子美詩撥棄潭州百斛酒蕪沒
瀟岸千株菊杜牧九日詩菊花須插滿頭歸漢書景十
三王傳叢鞋折軸羽翮飛肉史記孔子世家臨河而歎
曰美哉水洋洋乎詩國
風泌之洋洋可以樂饑

次韻王定國馬上見寄

昨夜霜風入袂衣曉來病骨更支離踈狂似我人誰顧
坎軻憐君志未移但恨不携桃葉女尚能來趁菊花時
南臺二謝人無繼直恐君詩勝義熙公自註二謝從宋武帝九日燕戲馬
臺

莊子支離疏者頤隱於臍肩高於頂白樂天詩猶勝村
客病支離楚詞垺軻留滯注不過也垺坎同古今樂錄
王獻之二妾桃葉桃根獻之作
桃葉歌白樂天詩小妓携桃葉

與頤起孫勉泛舟探韻得未一作味字

牕前堆梧桐牀下鳴絡緯佳人尺書到客子中夜喟朝

來一樽酒晤語聊自慰秋蠅已無聲霜蟹初有味當為
壯士飲肯裂須磔蝟勿作兒女懷坐念蠨蛸畏山城亦
何有一笑瀉肝胃泛舟以娛君魚鼈多可餽縱為十日
飲未遽主人費吾儕俱老矣耿耿知自貴寧能傍門戶
啼笑雜猩猩要將百篇詩一吐千丈氣蕭條歲行暮迨
此霜雪未明朝出城南遺跡觀楚魏西風迫吹帽金菊
亂如沸願君勿言歸輕別吾所諱

遊齋間覽浙人呼蠡斯之善鳴者為絡緯織女詩國風
彼美淑姬可與晤語史記項籍紀樊噲瞋目視項王頭

髮上指目眦盡裂晉桓溫傳劉惔常稱之曰溫眼如紫
石稜須作蝟毛磔孫仲謀晉宣王之流也詩豳風蠨蛸
在戶又亦可畏也伊可懷也爾雅蠨蛸小蜘蛛長脚者
俗呼喜子論語疏腥曰餽謂生肉未煮者東方朔傳上
語竇太主曰恐羣臣從官多大為主費當是時董君見
尊不名稱主人翁飲大驪樂左思賦猩猩啼而就禽狝
狝笑而被格註猩猩形若狗人面善人言被執將死則
相對而泣狝狝狀如人長面黑身有尾踵見人即笑笑
則脣掩目晉和嶠傳森森如千丈松韓退之詩李杜文
章在光燄萬丈長國語靈王不顧其民一國棄之如遺
跡焉韓退之薦士詩霜風破佳菊嘉節迫吹帽詩大雅
如蜎如蜎如沸如羹魏志陳登傳劉備曰君求田問舍
言無可采是
元龍所諱也

次韻答頤起二首

挽袖推腰踏破紳舊聞携手上天門相逢應覺聲容似
欲話先驚歲月奔新學已皆從許子諸生猶自畏何蕃

殿廬直宿真如夢猶記憂時策萬言

公自注頃君及第時余為殿試編排

官見其答策語頗直其後與子由試舉人西京既罷回登嵩山絕頂嘗見其唱醺詩十餘首頃詩中及之

左傳或挽之或推之韓退之誰氏子詩白頭老母遮門啼挽斷衫袖留不止太山記上有小天門大天門仰視天門如從穴中望天牕王注新學以言王介甫新經之學也韓愈何蕃傳蕃入太學二十餘年歲舉進士學成行尊太學諸生推頌不敢與蕃齒

十二東秦比漢京去年古寺共題名

公自注去歲見之於青州早衰

怪我遽如許苦學憐君太瘦生茅屋擬歸田二頃金丹
終掃雪千莖何人更似蘇司業和遍新詩滿洛城

漢書高祖紀田甬曰秦形勝之國帶河阻山縣隔千里
秦得百二焉地方二千里持戟百萬齊得十二焉此東
西秦也陸士衡齊謳行孟諸吞楚夢百二倂秦京後漢
左慈傳曹操欲殺之慈走入羊羣忽一老羝屈膝人言
曰遽如許太瘦生用李白朝杜甫詩已見前
註王注蘇司業源明也先生以比子由云

九日黃樓作

去年重陽不可說南城夜半千漚發水穿城下作雷鳴
泥滿城頭飛雨滑黃花白酒無人問日暮歸來洗鞞鞞

豈知還復有今年把琰對花容一呬莫嫌酒薄紅粉陋
終勝泥中千柄鍤黃樓新成壁未乾清河已落霜初殺
朝來白露如細雨南山不見千尋剝樓前便作海茫茫
樓下空聞櫓鴉軋薄寒中人老可畏熱酒澆腸氣先壓
煙消日出見漁村遠水鱗鱗山壓壓牛轄切詩人猛士雜
龍虎公自註坐客三十餘人多知名之士楚舞吳歌亂鵝鴨一杯相屬君
勿辭此景何殊泛清雪

杜牧之詩歸棹何時聞軋鴉楚辭九辨惜悽增歎兮薄
寒之中人韓退之聯句交斫雙缺齧韻注缺齒又罷缺

也一日獸食之餘曰齧漢張良傳上顧戚夫人曰為我
楚舞吾為若楚歌李白詩吳歌楚舞歡未畢青山欲銜
半邊日唐史李愬夜入蔡州擊鵝鴨
池以亂軍聲雪溪在湖州注再見

太虛以黃樓賦見寄作詩為謝

我在黃樓上欲作黃樓詩忽得故人書中有黃樓詞黃
樓高十丈下建五丈旗楚山以為城泗水以為池我詩
無傑句萬景驕莫隨夫子獨何妙雨雹散雷椎雄詞雜
今古中有屈宋姿南山多磬石清滑如流脂朱蠟為摹
刻細妙分毫釐佳處未易識當有來者知

秦始皇紀下可以建五丈旗詳見四卷戲子由詩註張景陽七命豐隆奮椎註豐隆雷公也唐杜審言傳嘗曰吾文章當得屈宋作衙官尚書孔安國注泗水涯石可以為磬杜牧秋娘詩京江水清滑生女白如脂

九日次韻王鞏

我醉欲眠君罷休已教從事到青州
鬢霜饒我三千丈
詩律輸君一百籌
聞道郎君閉東閣
且容老子上南樓
相逢不用忙歸去
明日黃花蝶也愁

世說桓公有主簿善別酒有酒輒令先嘗好者謂青州從事惡者謂平原督郵青州屬齊郡平原有鬲縣從事謂到臍下督郵謂在膈上往也李白詩白髮三千丈綠愁似箇長郎君東閣用李義山謁令狐綯詩語已見前

註晉庾亮傳亮在武昌諸佐吏殷浩之徒乘秋夜往登南樓不覺亮至諸人將起避之亮曰諸君少住老子於此興復不淺

送頌起

客路相逢難為樂常不足臨行挽衫袖更賞折殘菊佳人亦何念悽斷陽關曲酒闌不忍去共接一寸燭留君終無窮歸駕不免促岱宗已在眼一往繼前躅天門四十里夜看扶桑浴回頭一作顧望彭城大海浮一粟故人

在其下塵土相蹴踈惟有黃樓詩千古配淇澳公自注頌有詩

記黃樓
本末

白樂天詩相逢且莫推辭醉聽唱陽關第四聲一寸燭
用竟陵王子良刻燭為詩事已見前註唐書柳公權充
翰林學士文宗夜召對燭盡而語不盡宮人以蠟液濡
紙繼之後漢光武紀趣駕南轅注趣急也讀曰促漢官儀
泰山東上四十里至天門又東南有峯名曰觀雞鳴時
見日始出淮南子日出暘谷浴乎咸池入於扶桑是謂
晨明東方朔十洲記扶桑在碧海中葉似桑樹長數千
丈大二十圍兩兩同根更相依傍是名扶桑詩國風衛
淇澳美武公之德也

送孫勉

昔年罷東武曾過北海縣白河翻雪浪黃土如烝麴桑

麻冠東方一熟天下賤是時累饑饉常苦盜賊變每憐

追胥官野宿風裂面君為淮南秀文采照金殿

公自注君嘗考

中進士

第一人胡為事奔走投筆腰羽箭更被髯參軍豪篇來

督戰

公自注其兄莘老以詩寄之皆言戰事

親程三郡士玉石不能銜欲

知君得人失者亦稱善君才無不可要欲經百鍊吾詩

堪咀嚼聊送別酒嚙

九域志密州古跡有伏湛墓其志云琅邪東武人高密即東武也又濰州治北海縣追胥字出周禮小司徒注已見後漢班超傳嘗為官牘書報業投筆嘆曰大丈夫無它志畧猶當効傳介子張騫立功異域以取封侯安

能久事筆硯間乎李太白詩流星白羽腰間插晉郗超傳桓溫為大司馬辟超為參軍時王珣為主簿府中語曰髯參軍短主簿能令公喜能令公怒超髯珣短故也又互見十四卷史記秦始皇紀以衡石量書日夜有程不中程不得休息漢東方朔傳武帝既招英俊程其器能用之如不及揚子銜玉而賈石者其狙詐子應劭漢官儀金取堅剛百鍊而不耗孟東野懊惱詩好詩更相嫉劍戟生牙關前賢死已久猶在咀嚼間

李思訓畫長江絕島圖

唐張彥遠名畫記李思訓宗室也林甫之伯父

畫稱一時之妙官至左武衛大將軍其畫山水樹石筆格遒勁湍瀨潺湲雲霞縹緲時睹神仙之事竄然巖嶺之幽時人謂之李將軍也

山蒼蒼江茫茫大孤小孤江中央崖崩路絕猿鳥去惟

有喬木攬天長客舟何處來棹歌中流聲抑揚沙平風
軟望不到孤山久與船低昂我我兩煙鬟曉鏡開新粧
舟中賈客莫漫狂小姑前年嫁彭郎

庾信傷心賦山蒼蒼而正寒杜子美詩春動江茫茫解
律金敕勒歌天蒼蒼野茫茫風吹草低見牛羊漢武秋
風辭橫中流兮揚素波簫鼓鳴兮發棹歌丘遲詩棹歌
發中流鳴鞀響沓嶂杜牧阿房宮賦明星熒熒開粧鏡
也綠雲擾擾梳曉鬟也歐陽歸田錄世俗傳訛惟祠廟
之名尤甚江南有大小孤山而世俗轉孤為姑江側有
一石磯謂之澎浪磯遂轉為彭郎云彭郎小姑壻也余
過小孤山廟像乃一婦人而敕額為聖母廟豈止俚俗
之謬哉春明退朝錄陳簡夫詩云山稱孤獨
字廟塑女郎形過客雖知誤行人但乞靈

次韻答王鞏

我有方外客顏如瓊之英十年塵土窟一寸冰雪清竭
來從我游坦率見真情顧我無足戀戀此山水清新詩
如彈丸脫手不暫停昨日放魚回衣巾滿浮萍今日扁
舟去白酒載烏程山頭見月出江路聞鼉鳴莫作孺子
歌滄浪濯吾纓吾詩自堪唱相子權歌聲

晉謝奕傳桓溫辟為安西司馬岸憤笑詠無異常日溫
曰我方外司馬詩國風有女同車顏如舜英杜子美留
別章使君詩常恐性坦率失身為杯酒南史謝朓嘗云
好詩圓美流轉如彈丸也鄒陽酒賦其品類則洛陽醴

淥鳥程若下又詳五卷贈孫莘老詩註禮記春不相
注相謂送杵聲李太白詩滄浪吾有曲寄入棹歌聲

張安道見示近詩

人物一衰謝微言難重尋殷勤永嘉末復聞正始音清
談未足多感時意殊深少年有奇志欲和南風琴荒林
蜩螗一作亂廢沼蛙蠲淫遂欲掩兩耳臨文但噫噤蕭

然王郎子來自緱山陰

公自注其壻
王鞏携來

云見浮丘伯吹簫

明月岑遺聲落淮泗蛟鼉為悲吟願公正王度祈招繼

惛惛

漢司馬遷傳仲尼沒而微言絕晉衛玠傳王敦謂謝鯤曰微言之緒絕而復續不意永嘉之末復聞正始之音互見十三卷左傳昭三十一年荀躒掩耳而走太平廣記王仙客者劉振之甥也振有女曰無雙小仙客數歲皆幼稚相狎振妻常呼仙客為王郎子列仙傳王子喬好吹簫作鳳鳴遇浮丘公得仙互見前注公烏臺詩話張方平令王鞏將詩一卷來徐州軾作一詩題卷末云云軾意言人物衰謝不意復見張方平之文章才氣以譏諷今時衰薄也意以衛玠比方平故云清談未足多也又少年有奇志至臨文但噫喑言軾少年本有志欲和天子薰風之詩因見學者皆空言無實或雜引老佛異端之書文字雜亂故以荒林廢沼比朝廷新法屢有變政事多荒廢致風俗虛浮學者誕妄如蠅蚩之紛亂遂掩耳不欲論文也願公正王度祈招繼喑喑據左氏楚靈王欲求鼎於周求地於諸侯其臣石尹子革諫王其詩曰祈招之喑喑式昭德音思我王度式如玉式如

金形民之力而無醉飽之心靈王不能用以及於難
軾欲張方平當如蔡公謀父作祈招之詩以正王也

次韻王鞏顏復同泛舟

沈郎清瘦不勝衣邊老便便帶十圍蹀躞身輕山上走
謹呼船重醉中歸舞腰似雪金釵落談辯如雲玉塵揮
憶在錢塘正如此回頭四十二年非

南史沈約與徐勉書云老病百日數圍革帶嘗應移孔
以手握臂率計月小半分擅弓趙文子其中退然若不
勝衣後漢東平王蒼腰帶十圍晉載記尹緯慕容超李
勢赫連勃勃皆身長八尺腰帶十圍云便便用邊孝先
事注再見楚辭衆蹀躞而日進兮注蹀躞行貌李太白
效古詩歸時落日晚蹀躞浮雲驄杜子美詩三更風起

寒浪湧取樂喧呼覺船重白氏六帖趙飛燕舞宛轉如
流風之迴雪撫言杜牧與官妓賭酒因微吟曰骰子巡
巡裏手拈無因得見玉纖纖張祐應聲曰但知報道金
釵落彷彿還應露指尖後漢符融幅巾奮袂談辭如雲
注已見晉孫盛傳嘗詣殷浩談論對食奮擲塵尾毛落
飯中王衍傳每捉玉柄塵尾與手同色按東坡先生以
景祐三年丙子生是年元豐元年戊午
年四十有三故云回頭四十二年非

次韻張十七九日贈子由

千戈萬槊擁笏籬九日清樽豈復持

公自注是日南都敕使按兵

官

事無窮何日了菊花有信不吾欺逍遙瓊館真堪羨取
次塵纓未可縻迨此暇時須痛飲他年長劍挂君頤

晉史傳咸勅事云令史張濟案行城東有新立屋間範
籬障二十丈晉傳咸傳楊濟與咸書曰天下大器非可
稍了而相觀每事欲了生子癡了官事官事未易了也
了事正作癡復為快耳詩小雅迨我暇矣飲此湑矣杜
子美醉時歌忘形到爾汝痛飲真吾師戰國策田單攻
狄不能下齊兒謠曰大冠若箕修劍拄頤攻狄不下累
於梧邱李太白答王十二詩嚴陵高
揖漢天子何必長劍拄頤事玉階

次韻王鞏獨眠

居士身心如槁木旅館孤眠體生粟誰能相思琢白玉
服藥千朝償一宿天寒日短銀燈續欲往從之車脫軸
何人吹斷參差竹泗水茫茫鴨頭綠

趙飛燕外傳體溫舒無軫粟盧全詩白玉璞裏琢出相思心黃金鑛裏鑄出相思淚續仙傳彭祖云上士別牀中士異被服葯百裏不如獨卧後人習其術號彭祖經周易車說輻史記范睢傳須賈曰吾馬病車軸折楚辭九歌吹參差兮誰思

次韻王鞏留別

去國已八年故人今有誰當時交游內未數蔡克兒豈無知我者好爵半已縻爭為東閣吏不顧北山移公子表獨立與世頗異馳不辭千里遠成此一段奇蛾眉亦可憐無奈思餅師無人伴客寢惟有支牀龜君歸與何

人文字相娛嬉持此調張子一笑當脫頤

晉王導傳蔡謨戲嘲導導怒謂人曰吾往與羣賢共游洛中何曾聞有蔡克兒也謨蔡克子漢朱雲傳薛宣為丞相雲往見之宣偻賓主禮從容謂雲曰在田野無事且留我東閣可以觀四方奇士雲曰小生乃欲相吏耶宣不敢復言楚詞九歌表獨立兮山之上王羲之帖吾年垂耳順要欲一游目汶領足下但當保護以俟此期得果此緣一段奇事也本事詩寧王宅左有賣餅妻纖白明媚王一見屬目厚惠其夫取之寵愛逾等踰歲問曰汝復憶餅師否默然不對王召餅師使見之其妻注視雙淚垂頰若不勝情王乃歸之時坐客數人皆當時文士無不悽異王命賦詩右丞王維先成曰莫以今時寵難忘舊日思看花滿眼淚不共楚王言史記龜策傳南方老人用龜支牀足行二十歲老人死移牀龜尚生龜能行氣導引也張子謂安道也脫頤用匡衡解頤意

注已見

登雲龍山

醉中走上黃茅岡滿岡亂石如羣羊岡頭醉倒石作牀
仰看白雲天茫茫歌聲落谷秋風長路人舉首東南望
拍手大笑使君狂

次韻僧潛見贈

僧道潛字參寥於潛人能文章尤喜為詩嘗有句云風蒲獵獵

弄輕柔欲立蜻蜓不自由五月臨平山下路藕花無數滿汀洲過先生於彭城甚愛之以書告文與可謂其詩句清絕與林逋上下而通了道義見之令人蕭然蘇黃門每稱其體

製絕類儲光義非
近時詩僧所能及

道人胸中水鏡清萬象起滅無逃形獨依古寺種秋菊
要伴騷人餐落英人間底處有南北紛紛鴻雁何曾冥
閉門坐穴一禪榻頭上歲月空崢嶸今年偶出為求法
欲與慧劍加礪礪雲衲新磨山水出霜髭不剪兒童驚
公侯欲識不可得故知倚市無傾城秋風吹夢過淮水
想見橘柚垂空庭故人各在天一角相望落落如晨星
彭城老守何足顧棗林桑野相邀迎千山不憚荒店遠

兩腳欲趁飛猱輕多生綺語磨不盡尚有宛轉詩人情
猿吟鶴唳本無意不知下有行人行空塔夜雨自清絕
誰使掩抑啼孤惻我欲仙山掇瑤草傾筐坐嘆何時盈
簿書鞭扑晝填委煮茗燒栗宜宵征乞取摩尼照濁水
共看落月金盆傾

晉衛瓘見樂廣善談論奇之曰此人之冰鏡見之瑩然
傳燈錄六祖曰人有南北佛性無南北穴榻暗使管寧
木榻事注見九卷遊靈隱高峯塔詩維摩經以智慧劍
破煩惱賊揚子有刀者龍諸莊子養生主刀刃若新發
於硎漢貨殖傳諺曰刺繡文不如倚市門劉禹錫送張
盟序向所謂同年友當其盛時聯袂舉鑣亘絕九衢若

屏風然今來落落如曙星之相望杜子美贈李白詩亦有梁宋遊相期拾瑤草詩國風采采卷耳不盈傾筐杜贈閭丘師兄詩夜闌接軟語落月如金盆又惟有摩尼珠可照濁水源

次韻潛師放魚

法師說法臨泗水無數天花隨麈尾勸將淨業種西方莫待夢中呼起起哀哉若魚竟坐口遠愧知幾穆生醴况逢孟簡對盧仝不怕校人欺子美疲民尚作魚尾赤數罟未除吾願泚法師自有衣中珠不用辛苦沙泥底

佛頂心經說此陀羅尼已天雨寶花續紛亂下高僧傳梁僧法雲講次天花散墜起起用鄭玄夢孔子事詳十

卷孔長源挽詩註漢楚元王傳穆生不嗜酒元王常為
穆生設醴及王戊即位常設後忘設為穆生退曰可以
逝矣醴酒不設王之意怠不去楚人將鉗我於市稱疾
卧申公白生強起之穆生曰易稱知幾其神乎君子見
幾而作不俟終日遂謝病去唐孟簡為常州刺史與盧
仝遊北湖盡買漁人所獲魚放之仝作觀放魚歌校人
鄭子產事見孟子左傳襄二十五年子美入數俘而出
杜預曰子美子產也詩國風魴魚賴尾鄭箋賴赤也君
子仕於亂世其顏色瘦病如魚勞則尾赤楞嚴經譬如
有人於自衣繫如意珠不自覺知窮露它方乞食馳走
忽有智者指視其珠所願從心致大饒富方悟神珠非
從外得白樂天放魚詩不須泥沙底辛苦覓明珠公烏
臺詩話元豐元年四月作次韻潛師放魚詩一首云疲
民尚作魚尾赤左傳云如魚窺尾衡流而方羊喬注云
魚勞則尾赤是時徐州大水之後大役數起軾言民之
疲病如魚勞而尾赤也數罟謂魚網之細密者以言民

既疲病朝廷又行青苗助役不為除放如密網之取魚皆以譏朝廷新法不便以致大水之災也

與舒教授張山人參寥師同遊戲馬臺書西軒

壁蕪簡顏長道二首

古寺長廊院院行此軒偏慰旅人情楚山西斷如迎客
汴水南來故遠城路失玉鉤芳草合林亡白鶴古泉清
淡游何以娛庠老坐聽郊原琢磬聲

桂花叢談咸通中李蔚鎮彭城於戲馬臺西連玉鉤斜
道開創池沼構葺亭臺名之曰賞心白鶴則山中故事
也陳無已詩話乃云眉山長公守徐嘗與客登項氏戲
馬臺賦詩云路失玉鉤芳草合林亡白鶴古泉清廣陵

亦有戲馬臺其下有路號玉鉤斜唐高宗東封有鶴下
焉乃詔諸州為老氏築宮名白鶴公益誤用而後所取
信故不得不辨也禮記有虞氏養國老於上庠
養庶老於下庠王注泗濱多磬石故云琢磬聲

竹杖芒屨取次行下臨官道見人情天寒菽粟猶栖畝
日暮牛羊自入城沽酒獨教陶令醉題詩誰似皎公清
更尋陋巷顏夫子乞取微言繼此聲

左思魏都賦餘糧栖畝而不收詩國風日之夕矣牛羊
下來王注廬山僧惠遠與陶潛遊常沽酒飲之又吳興
僧清晝字皎然唐時有詩名於世
又稱長道為顏夫子故使陋巷字

滕縣時同年西園

人皆種榆柳坐待十畝陰我獨種松柏守此一片心君
看閭里間盛衰日駸駸種木不種德聚散如飛禽老時
吾不識用意一何深知人得數士重義忘千金西園手
所開珍木來千岑養此霜雪根遲彼鸞鳳吟池塘得流
水龜魚自浮沈幽桂日夜長白花亂青衿豈獨蕃草木
子孫已成林拱把不知數會當出千尋樊侯種梓漆壽
張富華簪我作西園詩以為里人箴

杜子美詩飽聞檜木三年大與致溪邊十畝陰禮記如
竹箭之有筠也如松柏之有心也貫四時而不改柯易

葉白樂天詩屈曲開池沼無非手自開本草菌桂花白
蕊黃牡桂亦曰白華葉冬夏常青文子十園之大始於
拱把後漢樊宏傳宏字靡卿南陽湖陽人也世祖之舅
父重嘗欲作器物先種梓漆時人嗤之然積以歲月皆
得其用向之笑者咸求假焉貲至巨萬而賑贍宗族恩
加鄉閭建武十五年定封宏壽張侯十八年帝過湖陽
祠重墓追爵諡
為壽張敬侯

次韻王庭老和張十七九日見寄

霜葉投空雀啅籬上樓筋力強扶持對花把酒未甘老
膏面染鬢聊自欺無事亦知君好飲多才終恐世相縻
請看平日銜杯口會有金椎為控頤

杜牧題北樓詩不為尋山試筋力
甯能寒上背雲樓劉夢得詩筋力上樓知又近來時世輕先輩好染髭鬚事
後生晉陸機傳張華嘗謂之曰人為文常恨才少子更患多莊子外物篇儒以詩禮發冢大儒臚傳曰東方作
矣事之何若小儒曰未解裾襦口中有珠儒以金椎控其頤徐別其類無傷口中珠

次韻參寥師寄秦太虛三絕句時秦君舉進士

不得

秦郎文字固超然漢武憑虛意欲仙
底事秋來不得解定中試與問諸天

漢司馬相如傳既奏大人賦天子說飄飄然有凌雲氣游天地之間意太平廣記袁昂書評云張伯英書如漢

武愛道憑虛欲仙劉禹錫和宣上人放榜
詩借問至公誰印可支郎天眼定中觀

一尾追風抹萬蹄昆崙玄圃謂朝隤回看世上無伯樂

卻道鹽車勝月題

崔豹古今注秦始皇有七名馬一曰追風杜子美遣興
詩地用莫如馬無良誰復記此日千里鳴追風可君意
十洲記崑崙山三角北曰閭風西曰玄圃東曰崑崙宮
韓退之雜說世有伯樂然後有千里馬千里馬常有而
伯樂不常有莊子馬蹄篇加之以衡扼齊之以
月題音義云月題馬額上當顯如月形者也

得喪秋毫久已冥不須聞此氣崢嶸何妨卻伴參寥子
無數新詩咳唾成

與參寥師行園中得黃耳蕈

遣化何時取衆香
法筵齋鉢久淒涼
寒蔬病甲誰能採

落葉

一作藥

空畦半已荒
老楮忽生黃
耳菌故人兼致白

芽薑蕭然放箸東南去
又入春山筍蕨鄉

維摩詰遣化菩薩往衆香國禮彼佛足言願得世尊所食之餘欲於娑婆世界施作佛事於是香積如來以衆香鉢盛滿香飯與化菩薩悉飽衆會

百步洪 并引

王定國訪余於彭城一日棹小舟與顏長道携盼

英卿三子游泗水北上聖女山南下百步洪吹笛
飲酒乘月而歸余時以事不得往夜著羽衣佇立
黃樓上相視而笑以為李太白死世間無此樂三
百餘年矣定國既去逾月復與參寥師放舟洪下
追懷曩游已為陳迹喟然而嘆故作二詩一以遺
參寥一以寄定國且示顏長道舒堯文邀同賦云
長洪斗落生跳波輕舟南下如投梭水師絕叫鳬雁起
亂石一線爭磋磨有如兔走鷹隼落駿馬下注千丈坡

斷絃離柱箭脫手飛電過隙珠翻荷四山眩轉風掠耳
但見流沫生千渦嶮中得樂雖一快何異水伯夸秋河
我生乘化日夜逝坐覺一念逾新羅紛紛爭奪醉夢裏
豈信荊棘埋銅駝覺來俯仰失千劫回視此水殊委蛇
君看岸邊蒼石上古來篙眼如蜂窠但應此心無所住
造物雖駛如吾何回船上馬各歸去多言說說師所呵
流沫用莊子已見前注莊子秋水篇秋水時至百川灌
河涇流之大兩涘渚涯之間不辨牛馬於是焉河伯欣
然自喜又互見七卷八月十五觀潮詩註傳燈錄僧問
金鱗寶資大師如何是金剛一隻箭師曰過新羅國去

又古德云錫子過新羅晉索靖傳有先識遠量知天下將亂指洛陽宮門銅駝嘆曰會見汝在荊棘中揚子說說者天下皆訟也又呱呱之子各識其親說說之學各習其師華嚴經愚人之所貪諸佛所訶

佳人未肯回秋波幼輿欲語防飛梭輕舟弄水買一笑

醉中盪漿眉相磨

摩同

不學長安閭里俠貂裘夜走臙脂

坡獨將詩句擬鮑謝涉江共採秋江荷不知詩中道何

語但覺兩頰生微渦我時羽服黃樓上坐見織女初斜

河歸來笛聲滿山谷明月正照金叵羅奈何捨我入塵

土擾擾毛羣欺卧駝不念空齋老病叟退食誰與同委

蛇時來洪上看遺迹忍見履齒青苔窠詩成不覺雙淚
下悲吟相對惟羊何欲遣佳人寄錦字夜寒手冷無人
呵

傳武仲舞賦目流睇而橫波晉謝鯤傳鯤字幼輿隣家
高氏女有美色鯤挑之女投梭折其兩齒時人為之語
曰任達不已幼輿折齒鯤聞之傲然長嘯曰猶不廢我
嘯歌戰國策蘇秦說齊宣王曰臨淄之途車轂擊人肩
摩異聞集書仙歌長安南坡名臘脂曹家有女名文姬
杜子美遣興詩賦詩何必多往往凌鮑謝宋玉招菟涉
江采菱發陽阿李太白詩涉江弄秋水愛此荷花鮮班
固西都賦毛羣內闌飛羽上覆詩國風委蛇委蛇退食
自公謝靈運登臨海嶠作題云與從弟惠連可見羊何
共和之沈約宋書靈運既東還與族弟惠連東海何長

瑜穎川荀雍太山羊璿之共為山澤之遊時人謂之四友李白久離別歌中有錦字書開緘使人嗟王仁裕開寶遺事李白於便殿草詔時大寒筆凍帝令宮妓十人各執牙筆呵之令白遞取書字

送參寥師

上人學苦空百念已灰冷劍頭惟一映焦穀無新穎胡為逐吾輩文字爭蔚炳新詩如玉屑出語便清警退之論草書萬事未當屏憂愁不平氣一寓筆所騁頗怪浮屠人視身如丘井頽然寄淡泊誰與發豪猛細思乃不然真巧非幻影欲令詩語妙無厭空且靜靜故了羣動

空故納萬境閱世走人間觀身卧雲嶺鹹酸雜衆好中
有至味永詩法不相妨此語當更請

維摩經如焦谷牙又是身如邱井為老所逼一呌用莊
子字蔚炳用周易字並已見韓退之送高閑上人序張
旭善草書喜怒窘窮酣醉無聊不平有動於心必於草
書發之今閑師浮屠氏其為心泊然無所起其於世澹
然無所嗜泊與澹相遭類墮委靡潰敗不可收拾則其
於書得無象之乎按公詩乃用其意而反之抑宗元報
崔黯書有嗜酸鹹者不得則大戚

夜過舒堯文戲作

名煥字堯文時為教授見本卷中秋月注

先生堂上霜月苦弟子讀書喧兩廡推門入室書縱橫

蠟紙燈籠晃雲母先生骨清少眠卧長夜默坐數更鼓
耐寒石研欲生冰得火銅餅如過雨郎君欲出先自贊
坐客歛衽誰敢侮明朝阮籍過阿戎應作羲之羨懷祖
韓退之桃源歌月明伴宿玉堂空骨冷魂清無夢寐劉
筠詩溪簾未破冰生研白樂天懶放詩今早天氣寒郎
君應不出自贊字出漢書東方朔傳晉王戎傳阮籍嘗
適戎父渾俄頃輒去過戎良久然後出謂渾曰共卿言
不如共阿戎談晉王羲之傳謂諸子曰吾不減懷祖而
位遇懸邈當由汝等不及坦之故邪王述字懷祖坦之
也述子

十月十五日觀月黃樓席上次韻

中秋天氣未應殊不用紅紗照坐隅山下白雲橫匹素
水中明月卧浮圖未成短棹還三峽已約輕舟泛五湖
為問登臨好風景明年還憶使君無

吳越春秋范蠡扁舟出三
江入五湖人莫知其所適

答王定民

王定民字佐才東
萊人俊民弟也

開緘夾夾滿銀鈎書尾題詩語更適八法舊聞宗長史
五言今復擬蘇州筆蹤好在留臺寺旗隊遙知到石溝
欲寄鼠須并蠶紙請君章草賦黃樓

晉索靖傳草書之為狀也婉若銀鈎飄若驚鸞法書苑
索靖矜其書名曰銀鈎蠶尾又八法起於隸字始自崔
張鍾繇傳授李陽冰云王逸少工書十五年中偏工永
字以其八法之執能通一切字長史張旭也韋蘇州注
再見鼠須蠶紙注見本卷章草漢
元帝時史游作急就章解散隸體

次韻王廷老退居見寄二首

王廷老
字伯敬

浪蘂浮花不辨春歸來方識歲寒人回頭自笑風波地
閉眼聊觀夢幻身北牖已安陶令榻西風還避庾公塵
更搔短髮東南望試問今誰裏舊巾

韓退之杏花詩浮花浪蘂鎮長有纔開還落瘴霧中金
剛絰一切有為法如夢幻泡影晉王導傳庾亮雖居外

鎮而執朝廷之權導內不能平嘗遇西風
起舉扇自蔽徐曰元規塵汙人亮字元規

接果移花看補籬腰鎌手斧不妨持上都新事長先到
老圃閑談未易欺釀酒閉門開社甕殺牛留客解耕縻
何時得見纖纖玉右手持杯左捧頤

鮑明遠詩腰鎌刈葵藿杜子美詩獨遠虛齋往常持小
斧柯唐書劉黑闥屏居漳南諸將詣之黑闥方種蔬即
殺耕牛與之共飲

次韻顏長道送傳倅

兩見黃花掃落英南山山寺遍題名宗成不獨依岑范

魯衛終當似弟兄去歲雲濤浮汴泗與君泥土滿衣纓
如今別酒休辭醉聽雙洪落後聲

宗岑用東漢宗資成瑨事詳見十一卷趙郎中見和詩
註雙洪蓋徐州二水先生徐州鹿鳴燕賦詩叙云俯聽
雙洪之號
怒即此也

施註蘇詩卷十五

欽定四庫全書

施註蘇詩卷十六

宋 蘇軾 撰

施元之原註

武進邵長蘅刪補

詩四十八首

起在彭城至元豐
己未移守吳興作

雲龍山觀燒得雲字

丁女真水妃寒山便火耘隕霜知己殺坯戶聽初焚
束縕方熠燿敲石俄氤氲落點甘泉烽橫煙楚塞氛
窮虵上喬木潛蛟躡浮雲驚飛墮傷雁狂走迷癡麇
谷蟄起蜩燕山妖竄夔獫野竹爆哀聲幽桂飄冤芬
悲同秋照蟹快若夏燎蚊火牛入燕壘燧象奔吳軍
崩騰井陘口萬馬皆朱憤搖曳驪山陰諸姨爛紅裙
方隨長風卷忽值絕澗分我本山中人習見匪獨聞
偶從二三子來訪張隱君君家亦何有物象移朝曛

把酒看飛燼空庭落續紛行觀農事起畦隴如纈紋
細雨發春穎嚴霜倒秋蕒始知一炬力洗盡狐兔羣

韓退之陸渾火詩女丁婦壬傳世婚左傳昭九年鄭
裨竈曰火水妃也杜預曰火畏水故為之妃妃一音
配史記貨殖傳楚越之地地廣人稀飯稻羹魚或火
耕而水耨左傳僖三十三年隕霜不殺草定元年冬
十月隕霜殺菽月令蟄蟲坯戶又是月也草木黃落
乃伐薪為炭漢蒯通傳束緼請火毛詩注熠燿燐也
已見前柳宗元詩夜發敲石火杜子美烽火詩雲邊
落點殘漢匈奴傳孝文帝時胡騎入代句注邊烽火
通於甘泉長安關輔記甘泉宮在今池陽縣西去長
安三百里左傳襄二十七年伯夙謂趙孟曰楚氛甚
惡漢志天馬歌竊浮雲竊音躡國語木石之怪曰夔
魍魎水之怪曰龍罔象土之怪曰羆羊白樂天別東

林詩春雨星攢尋螢火注餘杭風俗寒食雨後家家
持燭尋螢歐陽公憎蚊詩燠簷苦煙埃燎壁疲照燭
史記田單傳灌脂束葦於牛尾燒其端夜縱之牛尾
熱怒而奔燕軍所觸盡死左傳定四年楚鍼尹固與
昭王同舟王使執燧象以奔吳師杜預曰燒火燧繫
象尾使赴吳師驚卻之謝靈運詩崩騰永嘉末韓退
之詩崩騰相排拶漢韓信傳未至井陘口三十里止
舍夜半傳發選騎二千人人持一赤幟從間道草山
而望趙軍戒曰趙見我走必空壁逐我若疾入拔趙
幟立漢幟趙軍還歸壁壁皆漢赤幟大驚遂亂遁走
毛詩碩人注朱憤以朱纒鑣扇汗也舊唐書楊貴妃
傳姒三人皆有才貌玄宗並封夫人長曰大姨封韓
國三姨封虢國八姨封秦國每年十月幸華清宮國
忠姊妹五家扈從每家一隊著五色衣五家合隊照
映如百花之煥發互見八卷和蘇州太守詩
註玄宗紀天寶六載改驪山溫泉為華清宮

和田國博喜雪

疇昔月如晝曉來雲暗天
玉花飛半夜翠浪舞明年
螟螣無遺種流亡稍占田
歲豐君不樂鐘磬幾時編

公自注田
有服不樂

禮記檀弓余疇昔之夜王注玉花言雪翠浪言麥雪
盛則麥熟也柳子厚詩麥芒際天搖青波詩小雅去
其螟螣及其蠱賊漢宣帝記流民自占八
萬餘口周禮磬師註宮懸有編鐘編磬

祈雪霧豬泉出城馬上作贈舒堯文

三年走吳越踏遍千重山
朝隨白雲去暮與棲鴉還

翩如得木狖飛步誰能攀一為符竹累坐老敲榜間
此行亦何事聊散腰腳頑浩蕩城西南亂山如玦環
山下野人家桑柘雜榛菅歲晏風日暖人牛相對閑
薄雪不蓋土麥苗稀可刪願君發豪句嘲詆破天慳
韓退之詩青玉刻佩聯玦環果州清居和尚述牧牛
圖第十章露地白牛安眠牧者禪寂第十一章牛亡
而鞭筠尚在第十
二章人牛俱亡

次韻舒堯文祈雪霧豬泉

長笑蛇醫一寸腹銜水吐電何時足蒼鵝無罪亦可

憐斬頸橫盤不敢哭豈知泉下有豬龍卧枕雷車踏

陰軸前年太守為旱請雨點隨人如撒菽

公自注傳
欽之曾禱

此泉
得雨

太守歸國龍歸泉至今人詠淇園綠我今又復

罹此旱凜凜疲民在溝瀆卻尋舊跡叩神泉坐客仍

攜王子淵

公自注欽之時
客惟舒在矣

看草中和樂職頌新聲妙

語慰華顛曉來泉上東風急須上冰珠老蛟泣怪詞

欲逼龍飛起嶮韻不量吾所及行看積雪厚埋牛誰

與春工掀百蟄此時還復借君詩餘力汰輶仍貫笠

揮毫落紙勿言疲驚龍再起震失匙

酉陽雜俎王彥威鎮汴夏旱季圯曰欲雨甚易耳求
蛇醫四頭十石甕二枚每甕二蛇醫水浮其中木蓋
泥之分置閑處設席燒香選小兒十歲已下十餘令
執小青竹晝夜擊之不得少輟一日兩夜雨大注蛇
醫蜥蜴別名夷堅乙志劉居中隱嵩山巔有大蜥蜴
數百皆長三四尺人以食就手飼之拊摩其體滑膩
如脂一日聚繞水盞邊各就取水纔入口即吐出已
圓結似彈丸積之於側俄頃間累累滿地忽震雷一
聲彈丸皆失去明日人來言昨午雨雹大作乃知蜥
蜴所為者此也王注祈雨法刑白鵝景德皇祐中詔
以其法頒下諸道又志林云鵝能警盜亦能卻蛇且
又有祈雨厄悲夫北夢瑣言邛州有秋有牝豕出入
號豬龍湫又元和末建州山寺夜半門外喧然人於
窓中窺見數人運斤造雷車博物志地下四柱三十

六萬軸犬牙相牽漢王褒字子淵作中和樂職宣布
詩詳見十卷次韻章傳道喜雨詩注後漢崔駰傳包
胥單辭而存楚唐且華顛以悟秦注華顛謂白首也
左傳宣四年伯棼射王汰輈以貫笠韋三國蜀先主
傳方食失匕
箸注已見

石炭

并引

彭城舊無石炭元豐元年十二月始遣人訪獲於
州之西南白土鎮之北冶鐵作兵犀利勝常云

君不見前年雨雪行人斷城中居民風裂肝濕薪半束
抱衾裯日暮敲門無處換豈料山中有遺寶磊落如礬

音萬車炭流膏迸液無人知陣陣腥風自吹散根苗一
發浩無際萬人鼓舞千人看投泥潑水愈光明爍玉流
金見精悍南山栗林漸可息北山頑鑛何勞鍛為君鑄
作百鍊刀要斬長鯨為萬段

杜子美詩城中斗米換衾裯相許寧論兩相直唐韻鑿
美石黑色楚辭宋玉招魂十日代出流金爍石晉載記
赫連勃勃造百鍊剛刀為龍雀大鐸李白王節士歌安
得倚天劍跨海斬長鯨唐段秀實傳罵朱泚云狂賊可
斬萬段

人日獵城南會者十人以身輕一鳥過槍急萬

人呼為韻得鳥字

京東第二將雷勝隴西人以勇敢應募得官武力絕人騎

射敏妙按閱於徐徐人欲觀其能公為小獵城西是日小雨甫晴土潤風和觀者數千人

公作獵會詩序

兒童笑使君憂慍長悄悄誰拈白接離令跨金騾裏東風吹濕雪手冷怯清曉忽發兩鳴鶻

虛交切

相趁飛蟲小

放弓一長嘯目送孤鴻矯吟詩忘鞭轡不語頭自掉歸來仍脫粟鹽政煮芹蓼何似雷將軍兩眼霜鵲皎黑頭已為將百戰意未了馬上倒銀瓶得免不暇燎少年負

奇志踴躍百憂繞回首英雄人老死已不少青春還一
夢餘年真過鳥莫上呼鷹臺平生笑劉表

詩國風憂心悄悄愠于羣小唐韻接羅白帽也晉山簡
事注再見杜子美詩細馬時鳴金腰裏唐韻鶻箭即鳴
鏑也漢匈奴傳冒頓作鳴鏑習勒其騎射因話錄楊
巨源年老頭數掉言吟詩多致得白樂天詩閑倚小橋
立掉頭時一吟唐書令狐潮圍雍丘雷萬春立城上而
中六矢而不動潮遙謂張巡曰向見雷將軍乃知足下
軍令矣晉諸葛恢傳王導嘗謂曰明府當為黑頭公杜
子美詩馬上誰家白面郎又指點銀瓶索酒嘗世說魏
武將見匈奴使自以形陋不足雄遠國使崔季珪代帝
自捉刀立牀頭既畢使問謀問曰魏王何如匈奴使答
曰魏王雅望非常然牀頭捉刀人此乃英雄也張景陽
雜詩人生瀛海內忽如鳥過目杜子美詩餘生如過鳥

襄陽耆舊傳劉表為荊州刺史築臺名呼鷹仍作野鷹
來曲裏汚記劉表呼鷹臺在縣東七里高三丈周七十
丈

將官雷勝得過字代作

胡騎入雲中

一作
回中

急烽連夜過短刀穿鹵陣濺血貂裘

浣一來輦轂下愁悶惟欲臥今朝從公獵稍覺天宇大
一雙鐵絲箭未發手先唾射殺雪毛狐腰間餘一箇

漢匈奴傳孝文後四年匈奴大入上郡雲中各三萬騎
漢書注回中地在安定其中有宮劉禹錫登天壇詩俯
觀羣動靜始覺天宇大杜子美期王將軍不至詩憶爾
腰下鐵絲箭射殺林中雪色鹿後漢公孫瓚傳始天下

兵起我謂
唾掌可決

臺頭寺步月得人字

風吹河漢掃微雲
步屣中庭月趁人
浥浥爐香初泛夜
離離花影欲搖春
遙知金闕同清景
想見羶車碾暗塵
回首舊遊真是夢
一簪華髮岸綸巾

臺頭寺送宋希元

相從傾蓋只今年
送別南臺便黯然
入夜更歌金縷曲
他時莫忘角弓篇

公自注是日與宋君同載松寺中

三年不顧東鄰女

公自注
取宋玉

二頃方求負郭田

公自注
取季子

我欲歸休君未可茂

先方議斲龍泉

江文通別賦黠然消寃者唯別而已杜牧之秋娘詩秋
持玉笋醉與唱金縷衣左傳昭二年晉侯使韓宣子來
聘享之韓子賦角弓既享宴於季氏有嘉樹焉韓宣子
譽之武子曰宿敢不封殖此樹以無忘角弓宋玉好色
賦臣東家之子登牆闚臣三年至今未許也晉張華傳
字茂先初牛斗間常有紫氣華聞豫章人雷煥妙達緯
象乃要問之煥曰寶劍之精上徹於天耳問何郡煥曰
在豫章豐城即補煥為豐城令煥到縣掘獄基入地四
丈得石函中有雙劍並刻題一曰龍泉二曰太阿是夕
斗牛間氣不復見杜子美詩徒勞望牛斗無計斲龍泉

種松得徠字

公自注其四在懷古
堂其六在石經院

春風吹榆林，亂莢飛作堆。
荒園一雨過，戢戢千萬栽。
青松種不生，百株望一枚。
一枚已有餘，氣壓千畝槐。
野人易斗粟，云自魯徂徠。
魯人不知貴，萬竈飛青煤。
束縛同一車，胡為乎來哉。
泫然解其縛，清泉洗浮埃。
枝傷葉尚困，生意未肯回。
山僧老無子，養護如嬰孩。
坐待走龍蛇，清陰滿南臺。
孤根裂山石，直幹排風雷。
我今百日客，自公
注時去替養此千歲材。
茯苓無消息，雙鬢日夜摧。
古今不百日，一俛仰作詩寄餘哀。

詩魯頌徂徠之松新甫之栢杜子美詩幹排雷雨猶力
爭淮南子千歲之松下有茯苓上有兔絲抱撲子松脂
入地千年變為茯苓又任子季服
茯苓十八年不復食穀面體玉光

作書寄王晉卿忽憶前年寒食北城之游走筆

爲此詩

王晉卿名詵太原人徙開封能詩善畫
以選尚魏國賢惠公主母宣仁高后於

神宗為同產晉卿慕東坡與
相游從嘗為作寶繪堂記

北城寒食烟火微落花胡蝶作團飛王孫出游樂忘歸
門前驄馬紫金韉吹笙帳底煙霏霏行人舉頭誰敢睇
扣門狂客君不麾更遣傾城出翠帷書生老眼省見稀

畫圖但覺周昉肥別來春物已再菲西望不見紅日圍
何時東山歌采薇把盞一聽金縷衣

李賀秦宮詞帳底吹笙香霧濃再見唐韻睇望也盼也
柳子厚聞歌詩翠帷雙卷出傾城歷代畫斷周昉畫子
女爲古今之冠王注東山東征之
詩也采薇三章皆言曰歸曰歸

往在東武與人往反作粲字韻詩四首今黃魯
直亦次韻見寄復和答

符堅破荊州止獲一人半中郎老不遇但喜識元歎我
今獨何幸文字厭奇玩又得天下才相從百憂散陰求

我輩人規作林泉伴寧當待垂老倉卒收一旦不見梁
伯鸞空對孟光案才難不其然婦女廁周亂世豈無作
者於我如既盥一作灌獨喜誦君詩咸韶音節緩夜光一
已多矧獲纍纍貫相思君欲瘦不往我真懦吾儕春微
祿寒夜抱寸炭何時定相過徑就我乎館飄然東南去
江水清且暖相與訪名山微言師忍榮

晉習鑿齒傳襄陽陷於苻堅堅素聞其名與釋道安俱
興而至以其有寒疾與諸鎮書云昔晉氏平吳利在二
陸今破漢南獲士才一人半耳又高僧傳云苻堅謂安
公一人鑿齒半人也晉地理志魏盡得荊州之地分南

郡以北立襄陽郡江表傳蔡伯喈貴異顧雍謂曰卿必
成名今以吾名與卿故名雍吳錄顧雍為蔡邕所嘆故
字元歎蔡邕初平元年拜左中郎將晉石苞傳許允謂
苞曰卿是我輩人杜子美嚴別駕相從歌垂老遇君未
恨晚似君當向古人求韓退之別知賦惟知心而難得
斯一旦而為收述異記有珠夜可以鑒故名夜光趙后
外傳真臘夷獻萬年蛤不夜珠光彩皆若月照獻帝春
秋呂布問曹公明公何瘦答曰所以瘦恨不蚤相得故
也杜子美寄岑參詩思君令人瘦家語孔子曰生於我
乎館杜子美聽許十誦詩余亦師梁可身猶縛禪寂傳
燈錄第三十祖僧粲三十二
祖弘忍即中華三祖五祖也

雪齋

公自注抗僧法言
作雪山於齋中

君不見峨眉山西雪千里北望成都如井底春風百日

吹不消五月行人如凍蟻紛紛市人爭奪中誰信言公
似贊公人間熱惱無處洗故向西齋作雪峰我夢扁舟
入吳越長廊靜院燈如月開門不見人與牛

公自注言
有詩見寄

云林下閑
看水牯牛惟見空庭滿山雪

楚辭招魂曾冰裁我飛雪千里舊唐書杜悰傳吐蕃維
州南界江陽岷山連嶺而西不知其極北望隴山積雪
如玉東望成都若在井底鹵號無憂城李德裕傳亦云
新書吐蕃傳削去成都井底語杜子美詩贊公釋門老
放逐還上國華嚴經以白旃檀塗身能除一切熱惱
白樂天詩既無白旃檀何以除熱惱人牛注見本卷

以雙刀遺子由子由有詩次其韻

寶刀匣不見但見龍雀環何曾斬蛟蛇亦未切琅玕胡
為穿窬輩見之要領寒吾刀不汝問有媿在其肝念此
力自藏包之虎皮斑湛然如古井終歲不復瀾不憂無
所用憂在用者難佩之非其人匣中自長歎我老衆所
易屢遭非意干惟有王玄通堦庭秀芝蘭知子後必大
故擇刀所便屠狗非不用一歲六七刳欲試百鍊剛要
須更泥燔作詩銘其背以待知者看

龍雀銀用赫連勃事注見本卷王集刀銘陸剌犀兕
水截鯨鯢列子湯問篇周穆王征西戎西戎獻昆吾之

劍用之切玉如切泥焉漢張騫傳竟不得月氏要領杜
子美詩妖腰亂領敢欣喜禮記倒載干戈包之以虎皮
白樂天古劍詩湛然玉匣中秋水澄不流又詩無波古
井水韓退之詩法曹貧賤衆所易晉衛玠云非意相干
可以理遣再見晉王覽傳覽字玄通呂虔有佩刀工相
之以為必登三公可佩此刀虔謂覽兄祥曰卿有公輔
之量故以相與祥臨薨以刀授覽曰汝後必興足稱此
刀覽後奕世多才興于江左左傳閔元年卜偃曰畢萬
之後必大史記刺客傳荆軻愛燕之狗屠及善擊筑者
高漸離又樊噲傳沛人也以屠狗為事漢書注刊圭角
泯鑠也莊子養生主族庖月更刀折也揚子龍螭于
泥蛻其肆矣家語周廟金人三緘其口而銘其背

游桓山會者十人以春水滿四澤夏雲多奇峰

爲韻得澤字

東郊欲尋春未見鶯花迹春風在流水鳬雁先拍拍孤
帆信溶漾弄此半篙碧艤舟桓山下長嘯理輕策彈琴
石室中幽響清磔磔吊彼泉下人野火失枯腊悟此人
閒世何者為真宅暮回百步洪散坐洪上石愧我非王
襄子淵甯見客臨流吹洞簫水月照連壁此歡真不朽
回首歲月隔想像斜川游作詩繼彭澤

韓退之病鵠詩青泥揜兩翅拍拍不得離桓山在彭城
泗水上即宋司馬桓魁墓又先生游桓山記云登桓山
入石室使道士戴日祥鼓雷氏之琴此詩蓋紀實也莊
子有人間世篇漢揚王孫傳報祈侯書曰支體束絡口

含玉石欲化不得鬱為枯腊千載之後棺槨朽腐乃得
歸土就其真宅漢王褒有洞簫賦子淵褒字又王褒為
益州刺史得王褒薦之詳已見前連璧謂王氏兄弟子
立子敏也晉夏侯湛傳與潘安仁同輿接茵京都人謂
之連壁陶淵明游斜川詩引云辛丑歲正月五日與二
三鄰曲同游斜川欣對不足共爾賦詩淵明嘗為彭澤
令

戴道士得四字代作

戴日祥江
南人也

少小家江南寄跡方外士偶隨白雲出賣藥彭城市雪

霜侵鬢髮塵土汙冠袂賴此三尺桐中有山水意自從

夷夏亂七絲

一作絃

久已弃

一作廢

心知鹿鳴三不及胡琴

四使君獨慕古嗜好與衆異共弔桓魋宮一灑孟嘗淚
歸來鎖塵匣獨對斷絃喟挂名石壁間寂寞千歲事

韓退之送張道士詩序寄跡老子法中莊子大宗師孔
子曰彼游方之外者也後漢韓康傳常採藥名山賣於
長安市琴操琴長三尺六寸六分以象三百六十六日
列子湯問篇伯牙善鼓琴鍾子期善聽伯牙鼓琴志在
高山子期曰善哉我若若太山志在流水子期曰善
哉洋洋乎若江河古今樂錄天寶十三載始詔道調法
曲與胡部新聲合作自爾夷夏之聲相亂無復辨者左
傳襄四年歌鹿鳴之三三拜琴操有鹿鳴曲三疊胡琴
琵琶也本胡中馬上所鼓四絃以象四時詳五卷宋叔
達家聽琵琶詩註孟嘗淚用雅門周鼓琴事詳見四卷
甘露寺詩註呂氏春秋鍾子期死伯牙破琴絕絃終
身不復鼓琴杜子美詩千秋萬歲名寂寞身後事

次韻田國博部夫南京見寄二絕

歲月翩翩下坂輪
歸來杏子已生人
深紅落盡東風惡
柳絮榆錢不當春

火冷飴稀杏粥稠
青裙縞袂餉田頭
大夫行役家人怨
應羨居鄉馬少游

玉燭寶典寒食為大麥粥研杏仁為酪引飴沃之李義山詩粥香飴白杏花天白樂天詩留飴和冷食出火煮新茶馬少游語在後漢馬援傳詳見六卷山村詩注

月夜與客飲杏花下

真蹟草書在武寧宰吳節夫家今刻於黃州先生詩

話僕在徐州王子立子敏皆館於子蜀人張師厚來過二王方年少吹洞簫飲酒杏花下

杏花飛簾散

石刻作報

餘春明月入戶尋幽人褰衣步月踏

花影炯如流水涵青蘋花間置酒清香發爭挽長條落
香雪山城薄酒不堪飲勸君且吸杯中月洞簫聲斷月
明中惟憂月落酒杯空明朝峯地春風惡但見綠葉栖
殘紅

送蜀人張師厚赴殿試二首

忘歸不覺鬢毛斑好事鄉人尚往還斷嶺不遮西望眼

送君直過楚王山

韓退之西山詩為遮西望眼終是懶回頭史記項羽紀自立為西楚霸王王九郡都彭城王注此地有楚王山雲龍山下試春衣放鶴亭前送落暉一色杏花三十里
新郎君去馬如飛

公放鶴亭記雲龍山人張天驥於故居之東作亭山人有二鶴旦則望西山之缺以放焉暮則係東山而歸故名之曰放鶴亭據言神龍以來新進士杏園宴後皆於慈恩塔下題名又薛監逢值新進士出前導曰迴避新郎君又沈嵩得新榜封示羅隱隱詩曰人如流電馬如飛

再次韻答田國博部夫還二首

西郊黃土沒車輪滿面風埃笑路人已放役夫三萬指
從教積雨洗殘春

枝上稀疏地上稠忽看紅糝落牆頭風流別乘多才思
歸趁西園秉燭游

白樂天詩枝上稀疏地上多韓退之詩始見洛陽春挑
枝綴紅糝唐置別駕為太守之貳謂之別乘魏文帝詩
乘輦夜行遊逍遙步西園古詩何不秉燭遊

田國博見示石炭詩有鑄劍斬佞臣之句次韻
答之

楚山鐵炭皆奇物知君欲斫姦邪窟屬鏤無眼不識人
楚國何曾斬無極玉川狂直古遺民救月裁詩語最真
千里妖墓一寸鐵地上空愁蟣蝨臣

左傳哀十一年吳王賜子胥屬鏤以死又昭二十七年
楚令尹子常殺費無極王注無眼不識人暗用國志云
此箭無眼不識人語周禮夏官大僕救日月亦如之秋
官庭氏救月之矢夜射之盧仝月蝕詩傳聞古老說月
蝕蝦蟇精徑圍千尺入汝腹如此癡騃阿誰生又地上
蟣蝨臣全告訴帝天皇臣心有鐵一寸可剗妖墓痼腸
全號玉
川子

答郡中同僚賀雨

水旱行十年饑疫遍九土奇窮所向惡歲歲祈晴雨雖
非為已求重請終愧古鬼神亦知我老病入腰膂何曾
拜向人此意難不許重雲萋已合微潤先流礎蕭蕭止
還作坐聽及三鼓天明將吏集泥土滿鞞屨登城望薊
麥綠浪風掀舞愧我賢友生雄篇鬪新語君看大熟歲
風雨占十五天地本無功祈禳何足數渡河不入境豈
若無蝗虎而況刑白鵠下策君勿取

穀梁子雩者為旱求者也求者請也古人重請何重乎
請人之所以為人者讓也請道去讓也唐書田承嗣盜

有貝博魏衛相磁沼七州未嘗入朝每對詔使言辭不遜郭子儀遣使至承嗣西望拜曰茲膝不屈於人久矣今為公拜詩小雅有滄萑萑注滄雲興貌淮南子山雲蒸而柱礎潤京房易侯太平之世五日一風十日一雨後漢劉昆傳為弘農太守虎皆負子渡河卓茂傳為密令時天下大蝗河南二十餘縣皆被其災獨不入密縣界刑鵠用以祈雨事具景德皇祐詔書又見本卷後漢匈奴傳漢得下策世說周仲智飲酒醉瞋目還面舉蠟燭火擲伯仁伯仁笑曰阿奴火攻固出下策耳

罷徐州往南京馬上走筆寄字由五首

吏民莫扳援歌管莫淒咽吾生如寄耳寧獨為此別別離隨處有悲惱緣愛結而我本無恩此涕誰為設紛紛

等兒戲鞭鞭遭割截道邊雙石人幾見太守發有知當
解笑撫掌冠纓絕

法華經大通智勝如來廣說十二因緣觸緣受緣愛
又生緣老死憂悲苦惱漢周亞夫傳霸上棘門特兒戲
耳開元天寶遺事姚崇收荊州受代日吏民泣擁馬首
截轡留鞭以為遺愛漢百官表郡守秦官景帝中二年
更名太守晉陸雲傳張華撫掌大笑史
記滑稽傳淳于髡仰天大笑冠纓索絕

父老何自來花枝裏長紅洗盞拜馬前請壽使君公前
年無使君魚鼈化兒童舉鞭謝父老正坐使君窮窮人
命分惡所向招災凶水來非吾過去亦非吾功

後漢劉寵傳自會稽太守徵為將作大匠山陰縣有五
六老叟尾着皓髮人齋百錢以送寵寵勞之曰父老何
自苦王注方俗送官罷任以花枝挂綵謂之長紅白樂
天初到江州詩將迎勞動使君公左傳昭元年劉子曰
微禹吾其魚乎

古汴從西來迎我向南京東流入淮泗送我東南行暫

別復還見依然有餘情春雨

一作風

漲微波一夜到彭城

過我黃樓下朱欄照飛甍可憐洪上石誰聽月中聲

前年過南京麥老櫻桃熟今來舊游處櫻麥半黃綠歲
月如宿昔人事幾反覆青衫老從事坐穩生髀肉聯翩

閱三守迎送如轉轂歸耕何時決田舍我已卜

杜子美魏將軍歌將軍昔著從事衫九州春秋劉備在
荊州嘗於劉表坐起至廁見髀裏肉生流涕曰平常身
不離鞍髀肉皆消今不復騎髀裏肉生日月若馳老將
至矣而功業不建是以悲耳賈島詩碌碌復碌碌百年
轉雙轂

卜田向何許石佛山南路下有爾家川千畦種杭稌山
泉宅龍蜃平地走膏乳異時畝一金近欲為逃戶逝將
解簪紱賣劍買牛具故山豈不懷廢宅生蒿穰便恐桐
鄉人長祠仲卿墓

王注石佛山在蒼州蒼山縣之南漢東方朔傳酆鎬之間號為土膏其賈畝一金李太白詩幾日相別離門前生穠葵漢朱邑傳字仲卿少時為桐鄉嗇夫遇民有恩吏民敬愛焉及死其子葬之桐鄉西郭外民共為邑起冢立祠歲時祠祭又互見二卷送任伋通判詩註

次韻曹九章見贈

蘧瑗知非我所師流年已似手中著正平獨肯從文舉
中散何曾靳孝尼賣劍買牛真欲老得錢沽酒更無疑
雞豚異日為同社應有千篇唱和詩

蘧瑗事出淮南子注已見周易大衍之數五十其用四十有九後漢禰衡傳字正平唯善孔融及楊修常曰大

兒孔文舉小兒揚德祖融亦深愛其才上疏薦之融字文舉晉嵇康傳將刑東市索琴彈之曰昔袁孝尼嘗從吾學廣陵散每靳固之廣陵散於今絕矣康仕魏為中散大夫袁淮字孝尼杜子美醉時歌得錢即相覓沽酒不復疑韓退之南谿詩願為同社人雞豚燕春秋

書泗州孫景山西軒

落日明孤塔青山繞病身知君向西望不愧塔中人

泗州有僧伽塔塔中人蓋指僧伽

過淮三首贈景山兼寄子由

好在長淮水十年三往來功名真已矣歸計亦悠哉今

日風憐客平時浪作堆晚來洪澤口捍索響如雷

離騷已矣國無人莫我知兮漢蘇武傳李陵曰已矣令
子卿知吾心耳詩國風悠哉悠哉九域志楚州淮陰縣
洪澤鎮

過淮山漸好松檜亦蒼然藹藹藏孤寺泠泠出細泉故
人真吏隱小檻帶巖偏卻望臨淮市東風語笑傳

杜子美高齋詩吏隱適性情汝南
先賢傳鄭欽吏隱于蟻陂之陽

回首濉陽幕簿書高没人何時桐栢水一洗庾公塵此
去漸佳境獨游長慘神待君詩百首來寫浙西春

桐栢山在唐州桐栢縣淮水所出度公塵用王導語度亮字元規注見上卷次韻王廷老退居晉顧愷之傳每食甘蔗常自尾至本人或怪之云漸入佳境

舟中夜起

微風蕭蕭吹菰蒲開門看雨月滿湖舟人水鳥兩同夢
大魚驚竄如奔狐夜深人物不相管我獨形影相嬉娛
暗潮生渚弔寒蛭落月挂柳看懸蛛此生忽忽憂患裏
清境過眼能須臾鷄鳴鐘動百鳥散船頭擊鼓還相呼
余去金山五年而復至次舊詩韻贈寶覺長老

誰能斗酒博西涼但愛齋厨法鼓香舊事真成一夢過
高譚為洗五年忙清風偶與山阿曲明月聊隨屋角方
稽首願師憐久客直將歸路指茫茫

斗酒西涼用後漢孟陀事注再見法鼓出金山他處莫
能及僧每以小盟餽遺遠客詩大雅有卷者阿飄風自
南鄭氏云大陵曰阿有大陵卷然而曲迴風從長養之
方來入之劉禹錫生公講堂詩一方明月可中庭韓退
之喜侯喜至詩歌眼
聽新詩屋角月艷艷

游惠山

并引

余昔為錢塘倅往來無錫未嘗不至惠山既去五

年復為湖州與高郵秦太虛杭僧參寥同至覽唐處士王武陵竇羣朱宿所賦詩愛其語清簡蕭然有出塵之姿追用其韻各賦三首

夢裏五年過覺來雙鬢蒼還將塵土足一步漪瀾堂俯窺松桂影仰見鴻鶴翔炯然肝肺閒已作冰玉光虛明中有色清淨自生香還從世俗去永與世俗忘

漪瀾堂寺
中堂名

薄雲不遮山疎雨不濕人蕭蕭松徑滑策策芒屨新嘉

我二三子皎然無緇磷勝游豈殊昔清句仍絕塵弔古

泣舊史疾讒歌小旻哀哉扶風子難與巢許鄰

公自注謂竇羣

毛詩小旻大夫刺幽王也唐竇羣傳兄弟皆擢進士第獨羣以處士客隱毘陵蘇州刺史韋夏卿薦之朝并表其書報聞不召後夏卿入為京兆尹復言之德宗擢為左拾遺後為御史中丞上言李吉甫陰事憲宗面覆得其情大怒將誅羣吉甫為之解乃免子姓編竇望出扶風

敲火發山泉烹茶避林樾明牕傾紫盞色味兩奇絕吾
生眠食耳一飽萬想滅頗笑玉川子饑弄三百月豈如
山中人睡起山花發一甌誰與共門外無來轍

盧仝詩手閱月圓
三百片注再見

贈惠山僧惠表

行遍天涯意未闌將心到處遣人安
山中老宿依然在
案上楞嚴已不看
欹枕落花餘幾片
閉門新竹自千竿
客來茶罷空無有
盧橘楊梅尚帶酸

安心二祖公案注屢見司馬相如上
林賦盧橘夏熟黃柑橙榛枇杷燃柿

贈錢道人

書生苦信書世事仍臆度
不量力所負輕出千鈞諾
當

時一快意事過有餘忤不知幾州鐵鑄此一大錯我生
涉憂患常恐長罪惡靜觀殊可喜腳淺猶容卻而况錢
夫子萬事初不作相逢更何言無病亦無藥

漢季布傳楚人曰得黃金百不如得季布諾杜子美詩
人生快意多所辱北夢瑣言唐羅紹威帥魏博疾牙軍
之驕以計殺之至八千家雖去其偏而漸為梁祖凌制
乃謂親吏曰聚六州四十三縣鐵鑄一個錯不成傳燈
錄道吾和尚一鉢歌無可離無可著何處更求無病藥
藥是病病是藥到頭兩事須拈卻亦無藥亦無病正是
真如靈覺性

與秦太虛參寥會于松江而關彥長徐安中適

至分韻得風字二首

吳越溪山興未窮又扶衰病過垂虹
浮天自古東南水送客今朝西北風
絕境自忘千里遠勝游難復五人同
舟師不會留連意擬看斜陽萬頃紅

垂虹吳江長橋名郭氏玄中記天下之多者水焉
浮天載地白樂天詩波紅日斜沒沙白月平鋪

二子緣詩老更窮人間無處吐長虹
平生睡足連江雨盡日舟橫擘岸風
人笑年來三黜慣天教我輩一樽同
知君欲寫長相憶更送銀盤尾鬣紅

南史江淹謂郭鞏曰子咳唾成珠玉吐氣作虹霓非碌碌儔比也盧仝月蝕詩今夜吐艷如長虹杜牧之詩一夜風吹竹連江雨送秋王注南中風吹舟拍岸謂之罨岸風吹舟離岸謂之開岸風擘岸乃開岸之義也

次韻關令送魚

舉網驚呼得巨魚饒涎不易忍流酥更煩赤腳長髯老

來聽西風十幅蒲

韓退之寄盧仝詩先生有意許降臨更遣長須致雙鯉杜荀鶴詩連天一水浸吳東十幅帆飛二月風國史補舟船之盛盡於西江編蒲為帆大者或數十幅自白沙沂流而上常待東北風謂之潮信風

次韻秦太虛見戲耳聾

君不見詩人借車無可載，畱得一錢何足賴。晚年更似杜陵翁，右臂雖存耳先聾。人將蟻動作牛鬪，我覺風雷真一噫。聞塵掃盡根性空，不須更枕清流派。大朴初散失渾沌，六鑿相攘更勝敗。眼花亂墜酒生風，口業不停詩有債。君知五蘊皆是賊，人生一病今先差。瘥全楚懈切但恐此心終未了，不見不聞還是礙。今君疑我特佯聾，故作嘲詩窮嶮怪。須防額癢出三耳，莫放筆端風雨快。

孟郊移居詩借車載家具，家具少于車。杜子美空囊詩囊空恐羞澁，畱得一錢看。又清明詩此身漂泊苦西東。

右臂偏枯左耳聾晉殷仲堪傳父忠嘗患耳聰聞牀下
蟻動云牛鬪圓覺經識清淨故聞塵清淨聞清淨故耳
根清淨枕流用孫楚語屢見莊子應帝王儵與忽謀報
渾沌之德曰人皆有七竅此獨無有嘗試鑿之日鑿一
竅七日而渾沌死內典五蘊色受想行識也傳燈錄壽
州道樹禪師云伊伎倆有窮吾不見不聞無盡楚辭九
章蓀佻聾而不聞張君房脞說隋董慎為冥府追為右
曹仍辟常州秀才張審通管記慎令為判申天府有黃
衫人持狀去少頃復至云所申不當慎怒呼左右取方
寸肉塞其一耳遂無所聞審通乞更為判後有天符來
云甚允當慎喜謂審通曰非君不可正此獄命左右割
去耳肉臂為耳安于額上曰塞君一耳與君三耳審通
復活後數日覺額癢湧出一耳尤聰時人笑曰天有九
頭鳥地有三耳秀才亦呼為雞冠秀才杜子美寄李白
詩筆落
驚風雨

端午遍遊諸寺得禪字

肩輿任所適遇勝輒畱連焚香引幽步酌茗開淨筵微
雨止還作小牕幽更妍盆山不見日草木自蒼然

公詩話自

云非至吳越不見此景也

忽登最高塔眼界窮大千卞峯照城郭震

澤浮雲天深沉既可喜曠蕩亦所便幽尋未云畢墟落
生晚煙歸來記所歷耿耿清不眠道人亦未寢孤燈同
夜禪

晉王獻之傳嘗經吳郡聞顧辟疆有名園先不相識乘
肩輿徑入湖州圖經卞山極峻清秋爽月不見其頂尚

書震澤底定孔安國云吳縣南太湖名也吳郡續圖經太湖在吳縣南禹貢為之震澤周官爾雅謂之具區史記國語謂之五湖其實一也吐吸江海包絡丹陽義興吳郡吳興之境詩國風耿耿不寐

送劉寺丞赴餘姚

中和堂後石楠樹與君對牀聽夜雨玉笙哀怨不逢人
但見香煙橫碧縷謳吟思歸出無計坐想蟋蟀空房語
明朝開鑠放觀潮豪氣正與潮爭怒銀山動地君不看
獨愛清香生雲一作雪霧別來聚散如宿昔城郭空存鶴
飛去我老人閒萬事休君亦洗心從佛祖手香新寫法

界觀眼淨不覩登伽女餘姚古縣亦何有龍井白泉甘

勝乳千金買斷顧渚春似與越人降日注

白樂天招

張司業詩能來同宿否聽雨對林眠王注風雨對林事見與子由別於鄭州詩注中和堂在杭州先

生為倅日監秋試意劉寺丞為試官也風俗通漢章帝時零陵文學奚景於舜祠下得筌蓋白玉管也乃知古


以玉為筌後人易以竹耳白樂天待漏入閣詩碧縷爐香直紅垂旆尾闕王注先生監試杭州時以八月十六

日放榜故云明朝開鎖放觀潮前有監試呈諸試官又催試官考較戲作可攷也柳子厚答夢得詩耦耕若便

遺身世黃髮相看萬事休周易聖人以此洗心莊子山木篇願君剝形去皮洗心去欲而游於無人之地法界

觀明華嚴品中法界大旨注已見楞嚴經摩登伽女以婆毗迦羅先梵天呪攝阿難入於娑室唐地理志越州

餘姚縣武德四年析故句章縣置龍井餘姚有龍泉寺
在縣西王荆公嘗題詩云山腰石有千年潤井眼泉無
一日乾杜子美太平寺泉眼詩香美勝牛乳顧渚在湖
州長興縣產茶劉禹錫試茶詩何況蒙山顧渚春白泥
赤印走風塵
日注在越州



施註蘇詩卷十六